

JESUCRISTO ORETAGANODI NAIMIĒ RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue.

² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:
—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi.

⁵ Naimie rafuena comini inuamona, Juan Bautista micori jinui diga bautizade; iadedi cue

rafuena omoï ñnuamona, nano ñigarui illanona, cue Moo ie Joreñaona feiñoitomoï —raite.

Monamo Jesús jailla rafue

⁶ Ie llofueoicaigano ñiga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiaï micoriaï jaie sedaja isoi?

⁷ Naimie uai ote:

—Naie rafue suille facaiseconi jaca uiñoñeitomoï. Naimie siñona illamona, dama cue Moo naie rafue suilliruina uiñote;

⁸ iadedi cue Moo ie Joreñaona omoï feiñua mei, siño uai omoïmo iite. Ie jira Jerusalémo cuena lloitomoï. Judeamo, Samariamo, ua nana eniruemo ite nairaimo lloitomoï —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede.

¹⁰ Monamo nia eruaidemo, ieconi naimaci ñine Jusiñamui jaenici, mena ñima bairia isoi, bairediaimaiaï. Naie iaimaiaï ñiroi userede.

¹¹ Raitiaimaiaï:

—Galileo imaci, ¿bue ñellena monamo eruaidomoï? Omoï motomona Jesús monamo jaillana jai ciodomoï. Naimie jai jailla isoi, dane abido ico biite —raitiaimaiaï.

Matiana fetua rafue

¹² Naimacimo Jusiñamui jaenici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo

ochocientos metros dinori illanona, sábadoruimo Moisés micorí lloga dinori macaritimaci.

¹³ Rillano imaci cuartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci.

¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jiaino naimaci diga jiaí ofisoidimaci. Diga riñoniai jiaí ofisoidimaci. Jesús ei, María, jiaí ofisoide. Jesús amatiai jiaí ofisoidimaci.

¹⁵ Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶ —Amatiai, David micorí jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomonaie ñaiacinodi cuega. Iena uiñoticaí. Judas micorina uiñoticaí. Naimie Jesúsna gaitadinona ifode.

¹⁷ Naimiedi da cai llofueoicaigano imie. Cai diga majiuidi.

¹⁸ Ie maraiñoeno finoca rafuemona ucubena feiñua mei, ie comeci iuaina meiduanona, naie ucubena oni judaide. Judúuai illaicomini naie ucube diga eniruena ibadimaci. Nainomo Judas micorí ie cimaio cuinajanona, ie abina dama meinete. Rifailamona, ana uailamona, ie jebegi boficaillamona, nana ie jebegi jino uaide.

¹⁹ Nana Jerusalémo itino iena fididimaci. Ie jira cai uaido naie enirue mameciredi Acéldama. Oni dobaiñuamona dirue toillanie.

²⁰ Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimiemo iite.

Iese cuega.

²¹⁻²² Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

²³ Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías.

²⁴ Ie mei Jusiñamuimo jiidimaci:

—Nama, nana comini imaci comeciaina uiñotio. ¿Ñie imana jitaideo? Caina uiñota.

²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijana jai faionocaide —jiidimaci.

²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreña feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite.

² Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiai cacadimaci.

³ Iena naimacimo bairede. Iena ciodimaci. Irai boua isoi eruaide. Nana naimacimo baite.

⁴ Iese Jusiñamui Joreñoña feiñotimaci. Nana naimaci comeciaina namatade. Iemei diga nairai uailaido ñaitimaci, Jusiñamui Joreño naimacina ñaitatajamona. Naimaci ñaia uailaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judúuaidi itimaci. Diga nairaiamona bitimaci.

⁶ Creyentiai ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci.

⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci.

⁸ ¿Ñiese naimacina cacadicaí? Cai uaido dajerie ñaiana cacadicaí —raitimaci.

⁹ Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci,

¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiai itimaci.

¹¹ Judúuai itimaci. Judúuaiñedino jiai itimaci. Judúuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

¹² Nana eo rajicaidimaci. Danirre jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñiaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llamo cacarei. Naie rafuena lloiticue.

¹⁵ Omoí comeciaina omoí facaja isoi, jifaiñedicaí. Jitoma nia fuirí daidemo, bu jaca jifairainina.

¹⁶ Joel micorí bie rafuena jaie llote. Joel micorí Jusiñamui rafuena lloraíma. Naimie jaie lloga rafue birui caimo jai suide.

¹⁷ Llote:

Jusiñamui caimo llote: “Jiaíruido bie rafue suite.

Cue Joreña diga cominimo fecajitícue.

Iedo omoí uruiaí cue lluaña lloitimaci.

Iemona omoí coniruiaina nicairitaitícue.

Iemona omoí einamacina jiaí nicairitaitícue.

¹⁸ Ua nana cuena sedadinomo cue Joreña fecajitícue.

Naimaci cue lluaña lloitimaci.

¹⁹ Monamo eo jacirede rafuena ico suiñotaitícue.

Eniruemo eo jacirede rafuena ico jiaí suiñotaitícue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaitícue” Jusiñamui llote.

Ie Joreño caimo birui illamona, Joel micorí llogacino jai suide.

22 'Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

23 Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomo. Jusiñamuina ññoñedinona naimiena meinetadomoi;

24 iadedi fiodaillamona naimiena Jusiñamui jil-lotajano, llogi ie cacajamona naimie jillobide. Naimie fiodaite; iadedi fiodaillamona nainomo iñoñede.

25 David micori naimiena jaie llote:
Jusiñamui cue diga jaca illana uiñoticue.
Cue ecimo naimie ite, cue comecina ocuiñotallena.

26 Ie jira cue comeci caimare ite. Eo iobidicue.

Cue marena illemo jai jiai ocuridicue,

27 raiafomo cue joreña naimie fañonocaiña jira,

ie mare Jito abi rifaillana naimie jitaiña jira.

28 Naimie cuena jilloitallena uiñoticue.

Cue diga naimie illa jira, cue comeci caimare iite.

29 'Caimaci, cai usuma David micorina mare-fodo ñaiticue. David micori ñaia, dama naimie facaina ñaiñede. Jesúsna ñaite. David micori jaie fiodaite. Raiafomo jonega. Naifo bene nia illamona, naimiedi Jesúsna ñaiana uiñotica.

30 Ie ia David micori Jusiñamui rafuena llote. Naimie micoridi Jusiñamui naimiemo uanaicinona llwana uiñote. Jaie Jusiñamui naimiemo llote: "O uruiaimona damie illaimana illanona, ie comina sedajite" llote.

³¹ Cristona ñaite. David micorì nia suiñede rafuena llote. Naimie micorì Cristo jilloillena llote: “Raiafo Jusiñamui fodaillanomo Cristo Joreño fainonoçaiñeite. Cristo abi rifaiñeite” llote.

³² Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticai.

³³ Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi.

³⁴ Naimie abi monamo jaiñena jira, David micorì dama naimie facaina ñaiñede; ia Cristona ñaite. Ero, jaiie David micorì raite:

Jusiñamui Cristomo llote: “Cue ecimo ana raí.

³⁵ Ona ñinoñedinona o anamo itataitícue” raite. David micorì llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaídícue.

³⁷ Pedro lluana cacajano, naimaci comeciáimo riire baite. Pedromo iena jicanotimaci. Ie nabaiñiaimo jiai jicanotimaci:

—Caimaci, o lluana jai cacadícai. ¿Bue finoitícai?

³⁸ Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñoitomoi.

³⁹ Omoimo ie Joreño fecallena navui llote. Omoi uruiaimo jiai fecaité. Jiaie nairaiaí itinomo jiai fecaité. Ua nana Jusiñamui fetocanomo jiai fecaité.

⁴⁰ Díga uai naimacimo Pedro llote. Raite:

—Ailluena comini marañede rafuena birui finocana jaidimaci. Faifitimaci. Naimaci isoi jaiñeno; iadedi cue llwana omoi cacajamona, iena ñno.

⁴¹ Diga comini ie lloga uaina feiñuano, bautizadimaci. Nairuido ñibai tres mil comini creyentiaina jaidimaci.

⁴² Cristo oretagano llofuiana fueouidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

Cristona ñnotino illa rafue

⁴³ Cristo oretaganodi diga siño rafuena finuamona, nana comini jacinaitimaci.

⁴⁴ Nana creyentiaí damacina itimaci. Naimaci raruaí coninimo fecauidimaci.

⁴⁵ Dueredino ia, naimacina canollena, raruairedino naimaci raruaína vendedimaci. Iemei ñaie ucube dueredinomo fecadimaci.

⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiaí sedauidimaci. Nainomo danomo guillanona, Jesús fiodaillana comeciuidimaci. Caimare imaci comeciaí illamona, caidiñeno guisoidimaci.

⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro llucino

¹ Jusiñamui jofomo jia facaise Pedro iaïmaiaï Juan diga jaide. Jitoma ana ia, comini jiiuidimaci.

² Iaïmaiaï jaillanomo jiaie comini tisitaitimiena atiana ciodiïaïmaiaï. Tisitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauuidimaci. Nainomo naimiena rainauuidimaci, fo jaidinomona ucube jica-jicallena.

³ Iaïmaiaï fo jaiacania, ucube jicallena, ie onolli ñuitade.

⁴ Iaïmaiaï naimiemo eruaïllano, Pedro raite:

—Cocomo eruai.

⁵ Ie jira iaïmaiaïmo eruaide. Ra feiñoitena, ocianona sedade.

⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimie onollido llinuano, a naidanete. Ieconï naimie eillidi jillode. Ie taisicoñuai jiaï jillode.

⁸ Daiacaïllanona naidacaide. Macarïllanona, iaïmaiaï diga fo jaide. Jusiñamuïmo iobillacinona fecajano, daiacaïllanona macarite.

⁹ Nana comini naimie macarïllana cioidimaci. Naimie iobillacinona fecajana jiaï cacadimaci.

¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajicaïdïmaci.

¹¹ Naimiedi Pedro iaïmaiaï Juan diga nia llinuano, naimaci ñine Salomón micori finotaga jofu abi ibirimo comini aisidimaci. Rajicaïdïmaci.

¹² Iena ciuano, Pedro naimacina raite:

—Caimaci, ¿bue ñellena biemo raijicaidomoi? ¿Bue ñellena caimo iese eruaidomoi? “Daimaiaia iaimaiaia uaido naimiēna jilloitate” raillanona como eruaidomoi.

¹³ Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaia micoriaia, Abraham, Isaac, Jacob, ua nana cai usumatiaia micoriaia bie Jusiñamuina sedadimaci; iadedi Jesúna birui fecadomoi, coraillena. Pilato naimiēna jino marena oretaiacana jira, Pilato ecimo naimiēna llogidotomoi.

¹⁴ Mareuidimiēna jitaiñedomoi; iadedi come fatimiēna cárcelmona jino billana jitaidomoi. Barrabás raillamiēna jitaidomoi.

¹⁵ Jusiñamui dibeimo caina itatatimiēna meinetomoi. Naimie fiodaite; ia Jusiñamui naimiēna jillotate. Iena ciodicoco. Ie jira iena lloticoco.

¹⁶ Tisitaitimie jilluana jai ciodomoi. Naimiēna uiñotomoi. Jesúna naimie inua jira, Jesús naimiēna mairitate. Naimiēna raise jillotate. Iena jai ciodomoi.

¹⁷ 'Caimaci, ero, omoi finoca rafuena abina uiñoñeno finodomoi. Omoi illaicomini jiaia daje isoi finodimaci.

¹⁸ Jaie Jusiñamuidi ie facaina llorainina jiairuido suille rafuena llotatate. Naimacina Cristo llogi cacajana llotatate. Birui naie llogacino suide.

¹⁹ Omoi comeciaia iuailaia meido. Jusiñamui dibeimo omoi comeciaina meido. Iemei Jusiñamui omoi jeacinona dotaite. Iena jaca feitaite.

²⁰ Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi

Jilloitaraima.

²¹ Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido biena llote.

²² Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo llwana cacarei.

²³ Bie lloraimana bu cacareñenia, Jusiñamui naimiena duere finoite. Iemona faifite”.

²⁴ Nana Jusiñamui ie lloraini micoriaidi birui suille rafuena llotimaci. Samuel micori illa fa-caisemona naimaci biena llotimaci.

²⁵ Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: “Nana cominidi o uruiai muidona caimare iitimaci”.

²⁶ Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona fañonocaitallena, omoi dine naimiena nano jai oretate.

4

Cristo oretagamaiai llaicomini motomo illa rafue

¹ Comini diga Pedro iaimaiai Juan diga ñaia fa-caise, Jusiñamui diga ñairainidi naie iaimaiai dine bitimaci. Jusiñamui jofona sedaraini illaia diga, saduceuai railla comini diga jiai bitimaci.

² Fiodaillamona Jesús jai jillwana llo-fuetiaimaiai. Cominina iaimaiai llofuia jira, naie iaimaiai diga iciritimaci.

³ Iaimaiana gaitajanona, jai navuilla jira, cárcelmo jonetimaci, ie jitiramo naie rafuena siadollena.

⁴ Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentiaina jai itimaci.

⁵ Icoiti Jerusalémo nana judíuai illaicomini siadollena ofidimaci.

⁶ Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci.

⁷ Naimaci motomo Pedro iaimaiai Juan diga atianona, iaimaiaimo jicannotimaci:

—¿Bu uai diga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue.

⁹ Tisitaitimie jilluana birui cocomo jicannotomoi. “¿Buemona naimie jillode?” raillanona cocomo jicannotomoi.

¹⁰ Jesucristo uai diga jillode. Omoi buena uiñuana, ua nana judíuai comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tsisitaitimie jai benoconi naidaillana ciodomoi.

¹¹ Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúdi naie nofici isoide. Naimie rafuena omoi jitaiñena jira, naimiena meinetomoi.

¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

13 Jaciruiñeno marefodo llofuetiiaimaiaia. Nainomo itino iena cacajano, comecina facadimaci: “Abina uiñoñediiaimaiaia. Jamai bue isoidiaimaiaia”. Ie jira rajjicaidimaci; iadedi Jesús llofueoicaigaiaimaiaina illana uiñotimaci.

14 Jilloitagamie iaimaiaia diga naidaillana ciotimaci. Ie jira naimaci uai iñede.

15 Naie rafuena siadollena, naie illaicomini iaimaiaina bai oredimaci.

16 Coninimo jicannotimaci:

—¿Ñiese naie iaimaiaina nibaiticai? Nana Jerusalémo itino iaimaiaia siño rafuena finuana jai fididimaci. Iena janonidicai.

17 Jiaie comini iena fidii raillano, Jesús rafuena iaimaiaia llofuiana rairuiticai.

18 Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci.

19 Pedro iaimaiaia Juan diga naimaci uai ote:

—Ie rafuena coco llollena Jusiñamui jitaide. Omoi uaina coco ñnoia, Jusiñamui jitailla rafuena finoñeiticoco. Cocomo llono. ¿Bu uaina ñnoiticoco? ¿Jusiñamui? ¿Omoi? Cocomo iese llono.

20 Daimaiaia coco ciua rafuena lloticoco. Daimaiaia coco cacaja rafuena lloticoco —raite.

21 Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira.

22 Jai jillodimiemo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo j#acino

²³ Iaimaia jino jailla mei, iaimaia nabaiñia dine jaidiaimaia. Illacomini iaimaiaimo llua nallotiaimaia.

²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Eniruena finodio. Monaillaina finodio. Nana naiemo ite rana jai finodio.

²⁵ Cai usuma David micorina raise uifotica. Naimiedi ona sedadime. Naimiena bie rafuena o Joreño jai llotatajama, naimie llote:

¿Bue ñellena Jusiñamui diga judíuaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illacomini ofidimaci, Jusiñamui diga fuirillena. Jusiñamui facaisena iñedimaci.

Cristo facaisena jai iñedimaci llote.

²⁷ Naie rafue birui bene suide. Bie nairaimo Herodedi, Poncio Pilato diga, judíuaiñedino diga, judíuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci.

²⁸ Naimaci ofillama, nana o jitaille rafuedi, o jai lloga rafue diga, jai suide.

²⁹ Nama naimaci jaciruitajacinona jai uifotio. Cai comeciaina ocuiñota, o rafuena jacitaiñeno cai llolesa.

³⁰ Duidinona jilloita. O mare Jito Jesús uaido caina siño rafuena finota —jidimaci.

31 Jusiñamuimo jiiacino fuilla meinoconi, naimaci ofiracodi jaidisite. Jusiñamui Joreño nagamíai comecimo namatade. Iemona Jusiñamui uai jaitaiñeno llocana jaidimaci.

Creyentíai damacina illa rafue

32 Nana creyentíai damacina itimaci. Naimacimo raruiái ia, dajena naimacimo duide.

33 Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

34 Naimaci dine buna buena jaca jitañedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona,

35 Cristo oretaganomo fecadimaci. Ie mei dueredinomo imaci jitailla isoi fecauidimaci.

36 Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie.

37 Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifua rafue

1 Naie facaise Ananías ie ai diga iaímaiai eniruena jiaí fecade. Ie ai mamecidi Safira.

² Naie iba naimiemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.

³ Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niése Taife o comecimo namatade? Jusiñamui Joreñomo taino llotio, dabeí ucube omo fiebilla jira.

⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiñoeno facadio? Cominimo taino llotio. Jusiñamuimo tainona jiaí llotio.

⁵ Ananías bie uaina cacajano ieconi fiodaillamona oni caide. Nana iena ciódino eo jacinaitimaci.

⁶ Iemei nainomo ite conirueniaí naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoñoeno bite.

⁸ Pedro naiñaiñoemo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreñoena jifuetomico? Ero, o ini raiafomo jonetino saisia jai nasemo cascade. Naimaci ona jiaí jino ja uitimaci.

¹⁰ Naimie ecimo ieconi naiñaiño fiodaillamona, oni caide. Conirueniaí fo billano, naiñaiño fiodaillana ciódimaci. Jino uillano, ie ini abimo dafomo jonetimaci.

¹¹ Iena fidiamona, nana creyetiaí eo jacinaitimaci. Nana bie rafuena fididinodi jiaí eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofa abi ibirimo ofisoidimaci.

¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiaina ailluena comini jaidimaci. Ailluena iñiaí, ailluena riñoniaí, diese creyentiaina jaidimaci.

¹⁵ Imaci biiramo duidinona jonecaida, naisomo atidimaci. Pedro nainomo macarillano, o llotá naimie joreño naimacimo ibaillamona, “Jillobiticaí” raillano, atidimaci.

¹⁶ Jerusalémo ie fuemo ite nairaiaimona comini biadedi, duidinona jiaí atidimaci. Janaba anamo ite cominina jiaí atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiaí eo uradoidimaci. Saduceuai railla cominimo duidimaci.

¹⁸ Eo uradoillamona, Cristo oretaganona gaitajano, cárcelmo jonetimaci.

¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicomini uaidote. Cárcelmo policiaiana oretate, Cristo oretaganona atillena.

²² Cárcelmo jaidemo, naimacina cioñedimaci. Abido billanona, llotimaci:

²³ —Cárcel ie nase jaca ibaicana cidicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicai.

²⁴ Jusiñamui jofo nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Ñie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofo nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiana nofiaido fairinoi raillano.

²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabia, “Cai illaicomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina ñnoiacadicai.

30 Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei,

31 Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate.

32 Bie rafuena llofuecabiticaí. Jusiñamui Joreño uaido iena jiai llofueticaí. Jusiñamuina innotinomo Jusiñamuidi ie Joreño na jai fecade —raite.

33 Iena cacajano, illaicomini eo iciritimaci. Cristo oretaganona meineiacadimaci;

34 ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina innotimaci. Cristo oretaganona dallu bai oni oretaganona, naimie llote:

35 —Caimaci, omoi bie cominimo omoi finolle rafuemo comeciaina raise faca.

36 Jaie Teudas micori illaimana jaiacade. “Jai uaina baitimedicue” raillano, naimie dibeimo cuatrocientos inñiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide.

37 Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite.

38 Ie jira ja omoimo lloiticue: Bie cominina faínonocai. Jamai cominimona naimaci llogacino

iade, jamai cominimona naimaci finuacino iade, ieconi duite.

³⁹ Jusiñamuimona bie rafue ia, jaca niese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llwana feiñuano,

⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci;

⁴¹ iadedi illacomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina ridoñena jira, jiai caimare itimaci.

⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

Creyentiaina canollena, siete digamie diáconuaina illena, fetua rafue

¹ Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci.

² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai

fainonocaiadedi, maraiñede. Ra jamai cai fecaiadedi, jiai maraiñede.

³ Ie jira, amatiai, omoimona siete digamiëna feto. ñnoganona feto. Jusiñamui Joreño nana comecimo namatadinona feto. Eo abi uiñotinona feto. Ie isoide iñiaina feto. Bie ra fecarainina maijitimaci.

⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina ñnote.

⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiëna namatajamona, naimie uai eo siño. Comini motomo ailluena siño rafuena finouide.

⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiide. Naimaci diga damierie Cirene nairai imaci bitimaci. Damierie Alejandría nairai imaci

danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci;

¹⁰ iadedi naimaci uaitalle uaidi inede. Naimacimo Esteban uai isoidi uaidi inede. Jusiñamumona ie uaina ua jira, Esteban abina uinuano ñaite.

¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci.

¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite.

¹⁴ Naimiedi Jesús bie jofona judaillena lloste. Moisés micori caimo llogafuiaí fañonocaillena jiai lloste. Iena cacadicaí.

¹⁵ Iemo nana illaicomini naimiemo eruidimacimo, naimie uieco Jusiñamui jaienici isoi eruaide.

7

Esteban micori abi riidua rafue

¹ Jusiñamui diga nanoca ñairaíma Esteban micorimo jicanote:

—¿Ua ie isoi naimaci llucacino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano

³ llote: “O eniruemonai mai jai. O cominimona mai jai. Omo cue acatalle eniruemo jaitio”.

⁴ Ie jira Caldea railla eniruemonai naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate.

⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide.

⁶ Jusiñamui jiai llote: “O uruiaí jiaie comini eniruemo jianitimaci. Egiptomo jianitimaci. Naimacina duere finoitimaci. Cuatrocientos años llegi cacajitimaci.

⁷ Naimacina maijitaite nairaina duere finoiticue. Ie mei o uruiaí naie eniruemonai biitimaci. Bie illanomo cuemo iobillacinona fecajitimaci” llote.

⁸ Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

9 'Caimaci, José micorina Jacob micori uruiái micoriai uradoillamona, Egipto cominimo naimiena fecadimaci;

10 iadedi Jusiñamui naimiena eo sedade. Ie llegei ie cacajamona naimiena jillotate. Naimiemo uñoracinona fecade. Ie jira Faraón micori naimiena jiai gaide. Faraón micoridi Egipto illaima. Ie muidona Faraón Joséna fetode, nana Egiptomono itinona sedallena. Ie jofona jiai sedatate.

11 Naie facaiseconi nana Egipto comini aime guitimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiai micoriai naimaci illanomo guillena baiñedimaci.

12 Egiptomono guille illana Jacob micori fidiano, guille ollena, nano facaise ie uruiái micorina nainomo oretate.

13 Ie mei José ie amatiaina naimiena uñotade. Faraóni José comini illana fidide.

14 Ie jira Josédi ie moona uaidote. Nana ie cominina uaidote. Setenta y cinco digamie ite.

15 Ie jira Egiptomono Jacob micori jaide. Nainomo fiodaite. Ie uruiái micoriai nainomo jiai fiodaitimaci.

16 Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiái micoriaimona jaie ibade.

17 'Caimaci, Jusiñamui Abraham micorimo lloga rafue suille iaiei illa facaiseconi, Egiptomono cai cominidi eo jebuidimaci. Abraham micorimo: "Egiptomona o uruiái biitimaci" Jusiñamui jaie

llote.

¹⁸ Naie facaise jiaie illaïma Egiptona sedade. José micorina uiñoñede.

¹⁹ Ie jira cai cominina jifuiano maijitaude. Uruiaï fiodaïllena, naimacina imaci uruiaïna fainonocaitate.

²⁰ Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite.

²¹ Ie mei naimiedi fainonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide.

²² Naimie micori nana Egipto comini uiñuacina fueote. Illaïma uai isoi naimie uaidi ite. Eo abina uiñotimie.

²³ Caimaci, naimie micori cuarenta años illa facai, ie comini dine ie jaillemo ie comecina facade. Naimie cominidi cai judíuai comini.

²⁴ Egipto imiemona damie legi cacajana ciuano, naimiena riidote. Riiduanona, Moisés micoridi Egipto imiena meinete.

²⁵ Moisés micori comecina facade: “Cue muidona Egiptomona Jusiñamuidi cue cominina oretaita”. “Cue comini buena uiñotimaci” raïllanona comecina facade; ie iadedi iena uiñoñedimaci.

²⁶ Ie arediruido Moisés micoridi mena come iaïmaiaï fuirillana ciode. Iaïmaiaïna marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?”

²⁷ Duere finoacadimie naimiena oni ñuitade. Jicanote: “¿Bu odi cai illaïmana jonegao? ¿Bu caïmo ona llotatate juez isoi?”

28 ¿Na are Egipto imie o meinia isoi cuena jiai meineiacadio?”

29 Iena cacajano, come fajana naimie llinua jira, jacinailanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

30 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede.

31 Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote:

32 “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinailamona Moisés micori abi docaide. Jaciruillanona, erodañede.

33 Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaillanodi eo mareno.

34 Egiptomo cue comini llogi cacajana raise cidicue. Nimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote;

35 iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate.

36 Egiptomona Moisés naimacina atide. Egiptomo nia ia, diga siño rafuena finode. Jiairede

monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

³⁷Caïmaci, Moisés micoridi cai judíuai cominimo llote: “Omoïmona Jusiñamuidi damiena ie rafue lloraimana ico oretaite, naimie cuena oretaja isoi”.

³⁸Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caïmo fecallena, naimiedi cominina itatate uaina feiñote;

³⁹iadedi cai usumatiai micoriai naimiena ñnoiacaïñedimaci. Naimiena jitaiñedimaci. Egiptomo abido jaillemo naimaci comeciai facadimaci.

⁴⁰Ie jira comini dinena Aarón micorimo llotimaci: “Egipto eniruemono Moisés caina atide; iadedi naimie cai diga illana ja uiñoñedicaï. Cai facaina Jusiñamuina eruaide jiraraina fino, Egiptomo abido caina ifollena”.

⁴¹Iemo jurareta urue joreña finodimaci. Iena sedallena, faga toïca ocainaiaïna fecadimaci. Naimaci finoca rafueri eo caïmataidimaci.

⁴²Ie jira Jusiñamui naimacimona oni jaillanona, naimacina faïnonocai. Iemono jitomana sedauidimaci. Fïvuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo biena jaie iese cuela:

Jusiñamui llote: “Judíuai imaci, cuarenta años jofue iñenanomo omoï ia, cuemo omoï faga toïca ocainaiaï fecañedomoï;

⁴³iadedi cuemo omoï comeciaina facañeno Moloc railla jiraraina sedadomoï.

Refán railla ucuduna jiaí sedadomoi.
 Naimacina sedallena, jiraraina finodomoí.
 Ie jira Babilonia nairai baífemo omoína ore-
 taiticue”
 cuega. Naie facaise cai usumatiaí micoriaí
 Jusiñamuina jitaiñedimaci.

⁴⁴ 'Caimaci, bie rafuena cai fueollena, cai
 usumatiaí micoriaí motomo Jusiñamui illana
 lloiticue. Jofue iñenanomo cai usumatiaí micoriaí
 motomo daje jofo aillocona nitimaci. Nainomo
 Jusiñamuina sedallena, Jusiñamui Moisés micorimo
 acataja isoi, iena nitimaci. Jusiñamui jaie cuega
 noficidi naicomo eenoga.

⁴⁵ Josué diga bie eniruemó naimaci billa facaise,
 cai usumatiaí micoriaí naiconá atidimaci. Bie
 enirue jiaie nairaiamo jainaiáide; iadedi Jusiñamui
 naie nairaiaina dotajano, cai usumatiaí naie
 eniruena bairodimaci. Naico nainomo ite David
 micori facaiseconí.

⁴⁶ Jusiñamui David micorina eo canode. Ie
 jira David micoridi cai usuma Jacob micori ie
 Jusiñamui jofona finollena jicanote:

⁴⁷ ia Salomón micoridi jofona Jusiñamui iena
 finode;

⁴⁸ iadedi Jusiñamuidi iima finoca jofomo i-iñede.
 Jusiñamui facaina lloraima micoridi Jusiñamuina
 iese cuete:

⁴⁹⁻⁵⁰ Cai Nama raite: “Monamo cue illamona, nana
 comini cue anamo itimaci.

Jafaici oticuedena, naga rana cue finua jira, nain-
 omo cuena omoí sedallena, nie isoide jo-
 fona omoí finuana jitaiñedicue” raite.

⁵¹ 'Ero, omoí comeciaí jaiáirede. Omoí comeci
 ñnoñede. Jefonidomoi isoidomoi. Ie jira Jusiñamui

Joreño anamo iacaiñedomoi. Omoi usumatiai micoriai isoi itomoi.

⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue.

⁵³ Jusiñamui jaieniciaimona Moisés micori llogacinona feiñotomoi; iadedi iena iñoñedomoi.

Judíuaí Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite.

⁵⁵ Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode.

⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

⁵⁷ Esteban lluaana cacajano, jefo oroisite. Eo cuiiriillano, naimie dine aisicaidimaci.

⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside.

⁵⁹ Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

⁶⁰ Ieconí caiñici ifodo rainadacaida ado jide:

—Naimaci bie jeacino finua muidona, ibana oñeno.

Iese naimie jia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jiaí jitaide. Cristo rafuena eo inotinomona damierie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jiaínodi Samaria railla eniruemo jaidimaci; iadedi Cristo oretagano nine jaiñedimaci.

³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiaí gaitade.

Felipe Samariato illa rafue

⁴ Tuficaida jaidino naga illanomo Jesús rafuena llocana uitimaci.

⁵ Samariato Felipedi daje nairaímo jaide. Nainomo Cristo rafuena llofueuide.

⁶ Ailluena cominidi Felipe llofuiana eo raise feiñotimaci, naimie siño rafuena finua jira.

⁷ Felipedi diga jananiaí anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñujañujacaidinona jiaí jillotate.

⁸ Ie jira naie nairaímo ite comini eo iobidimaci.

⁹ Naie nairaímo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

¹⁰ Nana comini naimiena inotimaci. Abina uiñoñedino inotimaci. Abina uiñotino jiaí inotimaci. Raitimaci:

—Naimie uaidi Jusiñamui ie. Naimiedi siño jito — raitimaci.

¹¹ Iese naimacina are jifuate. Naimaci rajjicailla jira, naimaci naimiena cacadimaci.

¹² Ie mei Felipe Cristo ie mare rafuena lloste. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana lloste. Naimaci Felipe llofuiana innotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

¹³ —Jiai innoticue —Simóndi raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajjicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci.

¹⁵ Iaimaiai rillano, naimaci Jusiñamui Joreñoña feiñollena Jusiñamuimo jiidiaimaiai,

¹⁶ naimacimo Jusiñamui Joreñoña ia iñena jira. Cai Nama Jesús facaina jai bautizadimaci; ia Jusiñamui Joreñoña nia feiñoñedimaci.

¹⁷ Ieconia iaimaiai onolli naimacimo joniano, Jusiñamui Joreñoña feiñotimaci.

¹⁸ Naimaci Jusiñamui Joreñoña feiñuana Simóndi ciuano, ucubena iaimaiaimo fecaacade.

¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreñoña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadío; iadedi Jusiñamui naiena jamai fecade.

²¹ Bie rafuedi omo duiñede. Jusiñamuimona o comeci nia maraiñede.

²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica.

²³ Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredío.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaímaiaí llua mei, Jerusalémo abido bitíiaímaiaí. Abido billano, Samariamo diga comini illanuaimo Jesús ie mare rafuena llocana bitíiaímaiaí.

Etiopía imie creyentena jailla rafue

²⁶ Naie facaise Jusiñamui jaienisaímona damie Filipemo llote:

—Beicido joide naído mai jai. Jerusalémona Gazamo joide naisonai —llote. Naie naiso jofue iñenanodo joide.

²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuidi. Naiñaiño mamecidi Candace. Naimiedi nana naiñaiño gobierno ucubena sedade.

²⁸ Naimie jai abido jaillano, ie carretamo raita, Isaías micori cueba rabenicono ado facade.

²⁹ Jusiñamui Joreño Filipemo llote:

—Naimie dine iaírei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicon a uiñotio?

³¹ Naimie uai ote:

—¿Ñiese uiñoticue, bu cuena canoñenia?

Felipemo jicanote, naimie diga a jaillano danomo raillena.

³² Naimie facaca ciegafue iese raite:

Toica llau da fallena uilla isoi, naimiena uitimaci.

Toica llau da itirai garedino dine eeñena isoi, naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiena duere finodimaci.

Naimie uruia iñededí, ¿bu naimie rafuena lloite?

Meinia meinoconi, naimie jai iñede.

³⁴ Etiopía imie Felipemo jicanote:

—¿Bie lloraima bu iena llote? ¿Dama naimie iena llote? ¿Jaimiena iena llote? Cuemo llono.

³⁵ Iemei Felipedi bie ciegafuamona naimiemo Jesús ie mare rafuena llote.

³⁶ Naiona jaidiaimaiaimo, jinui illanomo ridiaimaiai. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷ Felipe uai ote:

—O comecimona o ñnoia, cuemona mare.

Naimie uai ote:

—Jesucristodi Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaimaiai. Felipedi naimiena bautizade.

³⁹ Jĩnuimona iaĩmaiaĩ bia, Jusiñamui Joreño Felipena oni uite. Etiopía imie Felipena dane cioĩñede; iadedi Etiopía imie iobicana jaide.

⁴⁰ Jusiñamui Joreño Azotomo Felipena uite. Cesarea dĩne naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

Saulo creyentena jailla rafue

(Hch 22.6-16; 26.12-18)

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaĩma dĩne jaide.

² Judíuai comini naie ñairaĩma anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. Iiñiaĩ baia, riñoniaĩ baia, naimacina Jerusalémo atiacade.

³ Cartana ua mei, naimie jaillano, Damascomo iaire ia, ieconi monamona damie naimie abina quetiñote.

⁴ Enĩruemo naimie ana uaillano, monamona damie naimiemo llwana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budio?

Monamona damie raite:

—Jesúdicue. Cuená duere finodío. Iemona o abina duere finodío, rícaillamona raise maíga jurareta suiñoacana isoi. Ie isodío. Rícaillamona, cuena duere finoacadío.

⁶ Naidacái. Damascomo mai jai. Nainomo o finolle rafue omo lloiticue.

⁷ Saulo díga jaidinodí ñaiñeno naidaidimaci. Naie uaina cacadimaci; iadedí buna cioiñedimaci.

⁸ Ieconí Saulo naidacaide. Ie uisí ecoricaillamona, erodatemo, jai buena cioiñede. Ie onollina llinocaida, naimiëna Damascomo uitimaci.

⁹ Darui amani cioiñede. Jusiñamuimo comecina facajamona, guiñede. Jiai jiroñede.

¹⁰ Damascomo Ananíana mameciredimie ite. Naimiedi creyente. Iníñenamona, Ananías nicaírilla isoi cacaillena, Cristodí naimiëmo rafuena llote:

—Ananías.

Naimie uai ote:

—Jíi, bene iticue.

¹¹ Cai Nama Cristo naimiëmo llote:

—Naidacái. Atona joide railla naísona jai. Judas ie jofomo jai. Naícomo Tarso ie Saulona jícano. Naimie cuemo jai jíide.

¹² Naimie damiëna jai nicaírite isoide. Ananíana mameciredimiëna nicaírite isoide. Ona nicaírite isoide. Naimie díne o jaillena ona nicaírite isoide. Naimiëmo o onolli joniamona, naimie dane cíuana nicaírite isoide.

¹³ Ananías uai ote:

—Nama, díga cominimona naimiëna fidídicaí. Jerusalémo naimiedi maraiñede rafuena ona ñnotinomo finode.

¹⁴ Jusiñamui díga nanoca ñairaima uai naimiëmo ite, nana bene ite creyentiaina gaitallena.

¹⁵ Cai Nama naimiëmo llote:

—Mai. Naimie jai cue fetoca, judíuaiñedíno mo cue rafuena llo llolla, illaicomínimo cuena llo llolla, judíuai comínimo cue rafuena jiaí llo llolla.

¹⁶ Cuena naimie jai ñnua muidona, naimie ñie isoi llegí cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o ñine orede, dane o cioillena, Jusiñamui Joreño nana o comecimo namatallena.

¹⁸ Ieconi Saulo uisimona lliciaí ico isoide ra uaide. Dane ciuana, naidaide. Ie mei jai bautizaga.

¹⁹ Ie mei jai guite. Dane mairide. Diga irui Damascomo ite creyentiaí diga naimie ite.

Damascomo Saulo illa rafue

²⁰ Judíuai ofiracomo naimie jaillanona, Jesús ie rafuena llofuete. “Jesúdi Jusiñamui Jito” raillanona llofuete.

²¹ Nana naimiena cacadinodi rajicaide. Raitimaci:

—Bimie Jerusalémo Jesúna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús ñibeimo jai ite.

²² Saulo nagarui jaitaiñeno llofuiamo fibioicaide. Llofuuide:

—Jesúdi cai Jilloitaraíma. —Naimie raise llofuia jira, judíuai ñinena iena uaitanidimaci.

²³ Digarui illa mei, judíuai comeciaina facadimaci, naimiena meinellena.

²⁴ Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

²⁵ naiona creyentiai naimiena oni uitimaci. Naimie jillobillena, llaigafu jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci.

²⁷ Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo llua jiai llote. Damasco naimie ia, Jesúna jacitaiño llofuiana jiai llote.

²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiño lloouide.

²⁹ Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci.

³⁰ Creyentiai iena fidiano, Cesaremo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruioicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai dine ride.

³³ Nainomo damie bïramo bïdena ciode. Naimiedi Eneas. Ocho años tïsitailamona bïde.

³⁴ Naimïena ciuano, Pedro naimïemo llote:

—Eneas, Jesucristo ona jai jillotate. Mai naidacai. O bïra ferï. —Ieconï naimiedi naidadate.

³⁵ Nana Lidamo ite comïni, nana Sarónmo ite comïni dïga, naimïena jilluana ciuanona, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide.

³⁷ Naie facaise naiñaiño duicotaide. Ie mei fiodaite. Naimaci einamacï finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñona jonetimaci.

³⁸ Lidamona Jope iaïre ite. Pedro Lidamo creyentiai illana fidiano, menamïe naimïe dïne oredimaci. Iaimaiaina llotatatimaci:

—Buena sedaño cai dïne raïre bi.

³⁹ Ie jira Pedro naidacaida, naie iaïmaiai dïga jaide. Naimïe ria, aneba ie cuartomo naimïena uitimaci. Nana feciñuai Pedro ecïmo eecana naidaidimaci. Dorcas finouiga inïroina naimïemo acatatimaci.

⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimïe raïta, Jusiñamuïmo jïde. Abïdo dobaicaida, naiñaiñoero erodate. Raite:

—Tabita, mai rainaicai.

Ieconï naiñaiño uisï oni erodate. Pedrona ciuano, a rainadate.

41 Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño jai cajenana naimaci cioillena.

42 Nana Jopemo ite comini naie rafuena fididimaci. Ie jira ailluena comini cai Namana innotimaci.

43 Jopemo Pedro diga irui Simón jofomo ite. Simóndi ocaina igoina cuidoraíma.

10

Cornelio comeci iuai meidua rafue

1 Cornelio raillamiedi Cesareamo ite. Naimiedi capitán. Italamona bite soldaduai naimie anamo itimaci.

2 Naimiedi Jusiñamui llogacinodo jaide. Nana ie comini diga Jusiñamuina innote. Judíuai cominimo ailluena rana jamai fecauide. Jusiñamuimo jiuide.

3 Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana cide. Jaienicidi uaidote:

—Cornelio.

4 Naimiena Cornelio jaciruoicaida eruaide. Jicanote:

—Nama, ¿buena jitaidio?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiaí feitañede.

5 Mai, Jopemo damierie o mullaiaímona oreta, Simón raillamiena atillena. Naimie jiaie mamecidi Pedro.

6 Naimiedi igoi cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

7 Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai inote.

8 Nana naimiemo Jusiñamui jaienici lluana naimacimo llua mei, Jopemo oretate.

9 Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jillena.

10 Naimie aimetaite. Guiacade. Guillena comini finodemo, naimiemo nicairilla isoi ite.

11 Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite.

12 Naiemo jiaiforie eruaide ocainaiai ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite.

13 Naimiedi monamona damie lluana cacade:
—Pedro, naidacaida, fajano, buena rino.

14 Pedro uai ote:
—Nama, dama ite. Moisés micori fimaidoga rille rana jaca riñedicue.

15 Monamona damie lluana dane cacade:
—Jusiñamui jai fimaidoñede. Ie jira iese lloñeno.

16 Dacaiño amani iese suide. Ie mei naie radi monamo abido jaide.

17 Pedro ie comecina facade: “¿Niese illana cidicue?” Ie daacaiño Cornelio oretagano bite. Simon illa jofo jicanuano, naie nasemo ride.

18 Simón Pedrona naie jofomo illana jicanotimaci.

19 Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode.

²⁰ Naidacaida, ana jai. Naimaci diga buena sedañoeno mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamiedicue. ¿Bue ñiaibitomoi billa?

²² Uai otimaci:

—Cornelio raillamie anamo iticai. Corneliomo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina inotimie. Nana judíuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci.

²⁴ Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote.

²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

²⁶ Pedrodi naimiena a naidanete. Raite:

—Mai a naidada. Cue jiai jamai imadicue.

²⁷ Naimie diga ñaiano fo jaidiaimaiai. Ailluena comini ofillana cide.

²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitaiñede.

29 Ie jira buena sedañoeno biticue, cuena o uaidua jira. ¿Bue ñellena cuena uaidotomoi? Cuemo llono.

30 Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienicí cuemo bairede. Naimie iniroi quenirede.

31 Cuena raite: “Jusiñamui o jiana cacade. Naimiedi duerede cominina o canuana feitañede.

32 Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoí cuidoraíma. Ie jofo monaillai fuemo ite”.

33 Iemona ona uaidotícue. O comecí marena jira, bene bitío. Jai nana bene itícaí. Jusiñamui caí díga jiaí ite. Caí Nama nana omo lluana cacareil-lena, bene itícaí.

Corneliomo Pedro llua rafue

34 Pedro uai ote:

—Jusiñamui nana cominí naimie inuana jitaillana jai uíñotícue.

35 Naga nairaímona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide.

36 Caí judíuai cominímo Jesucristo lluamona, Jusiñamui díbeimo caí illena jai uíñotícaí. Iemona Jusiñamui díga caí uri illana jai jiaí uíñotícaí. Jesúdi nana caí Nama. Bie rafuena navui janore fidídomoi.

37 Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede.

38 Jusiñamuidi ie Joreñoña Jesúmo fecade. Jesúdi Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui

naimie diga illa jira, diga Taife anamo itinona jillotate.

³⁹ Judíuái eniruemo nana naimie siño finoca rafuena ciodicái. Iena birui llocabiticái. Cruzmo jonianona, cai illaicomini naimiena meinetimaci;

⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí ciodicái.

⁴¹ Nana comini naimiena cioñedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticái. Naimie diga jamai jirodicái. Naimiena cai raise uñua jira, Jusiñamui caina fetode, naie rafuena llollena.

⁴² Cominimo bie rafuena lluaana caimo llote. Jusiñamui Jesúsna jai fetode, naimiena ñinoñedinona duere finollena. Nia fiodañedinona duere finoite. Jai fiodaitinona jiaí duere finoite. Ie jira Jesús rafuena llocana jaidicái.

⁴³ Jesús muidona naga naimiena ñinotimie ie marañedicinodi Jusiñamui dotalle. Iena nana Jusiñamui facaina lloraíni micoriaí jaiie llotimaci.

Judíuáiñedino Jusiñamui Joreño feñua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite.

⁴⁵ Iena cianona, Pedro diga bite creyentiaí raijicaidimaci. Naimacidi judíuái comini. Judíuáiñede cominimo Jusiñamui ie Joreño jai fecaja jira, raijicaidimaci.

⁴⁶ Jusiñamui Joreño naimacimo illamona, judíuáiñedinodi jiaie nairaí uailaido ñaitimaci. Naie ñaia uailaina uñoñedimaci. Jusiñamuimo

iobillacinona jai fecadimaci. Pedro diga bitino iena cacajano, raijicaidimaci. Iemei Pedro raite:

⁴⁷ —Cai feiñua isoi, Jusiñamui Joreñona jiai feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedroi naimiemo jai suide rafuena llote

¹ Judeamo ite Cristo oretagano, jiaie creyentiai diga, judíuaiñede comini Jusiñamui uaina feiñuana fididimaci.

² Pedro Jerusalémo abido ria, judíuai comini naimiena icidimaci.

³ Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiiia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride.

⁶ Nainomo eruaidicue, diga rana ciodicue: ocainaiaina, eniruemo jorocana jaidinona, nuicinaiaina. Iena ciodicue.

⁷ Monamona damie cuemo lluana cacadicue. Raite: “Pedro, naidacaillanona, fajanona, rino”.

⁸ Naie uai oticue: “Nama, dama ite. Moisés micori fimaidoga rille rana jaca riñedicue”.

⁹ Monamona dane cuemo llote: “Jusiñamui iena jai fimaidoñede. Ie jira iese lloño”.

¹⁰ Dacaiño amani iese suide. Ie mei monamo nana abido dane jaide.

¹¹ Ieconi daje amani ñima cai illa jofomo ridimaci. Cesareamona cue dine damie naimacina orede.

¹² Jusiñamui Joreñodi naimaci diga buena sedaño cue jaillena cuemo llote. Cue diga seis creyentiaí jiaí jaidimaci. Cuen auidotimie jofomo jaidicai.

¹³ Nainomo cai rilla mei, naimie ie jofomo Jusiñamui jaienicina navui cuana caimo llote. Naie jaienici naimiemo llote: “Jopemo cominina oreta, Simón Pedrona atillena.

¹⁴ O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote.

¹⁵ Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite.

¹⁶ Iena cue ciuamona, cai Nama Jesús lloga uaina comecticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomoí”.

¹⁷ Cai Nama Jesucristona cai ñnuamona, Jusiñamuidi ie Joreño caimo navui fecade. Naimacimo daje isoi birui fecademo, ¿ñiese Jusiñamui díbeimo ññeiticue?

¹⁸ Iena Cristo oretagano cacajano, jai naimaci uaina uaitallicino ññede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuaiñede comini comeciai iuai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci;

²⁰ iadedi tuficaidinomona jiaino Chripremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci.

²¹ Cristo uai naimacimo illamona, ailluena comini inotimaci. Cai Nama dibeimo jaidimaci.

²² Jerusalémo ite creyentiai iena fidiano, Antioquíamo Bernabéna oretatimaci.

²³ Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana inocana jaillana naimacimo llote.

²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facaise ailluena comini creyentiaina jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.

²⁶ Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damierie Jusiñamui rafuena lloraini bitimaci.

28 Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide.

29 Ie jira Antioquiamo ite creyentiaidi, Judeamo ite creyentiamo, ucubena oretaiacadimaci.

30 Nagamiai imacimo illa dierise ucubena oredimaci. Creyentiana llofueraimimo Bernabé diga, iaiaiai Saulo diga, naie ucubena oredimaci.

12

Herodes Agripadi creyentiana duere finua rafue

1 Naie facaise Herodes railla illaimadi creyentiamona damieriena gaitatate, naimacina duere finollena.

2 Lloebi diga Jacobo cimaimona jaitatate. Jacobodi Juan ama.

3 Ieri juduai illaicomini iobidimaci. Iena uñuamona, Herodes Pedrona jiai gaitatate.

4 Naie facaiseconi juduai comini llomenico guilla rafue ite. Naimiena gaitatajanona, cárcelmo jonete. Soldaduaia orede, naimiena sedalena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade.

5 Ie jira Pedro cárcelmo fiebide; iadedi creyentiai naimie facaina eo jidimaci.

6 Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci.

⁷ Ieconí caí Nama íe jaíenici dí cárcelmo baírede. Cárcelmo lligaiñote. Naimíena casitallena, jaíenici Pedro ciraigina jetade. Raite:

—Raíre naídacaí.

Íe meí naimíe onollímo íte lloeodí oni uaíde.

⁸ Jaíenici naimíena raite:

—O iníroina jíta. O zapatona jíaí jíta— Íena jítaja meí, naíe jaíenici dane raite—. O iníroi o abímo ferino. Cue díga maí bí.

⁹ Naíe jaíenici jinafona Pedro jino jaíde. Pedro dí naíe jaíenici naimíemo finoca rafuena uíñoñede.

—Nícaírilla ísoí comecina facadícue —raite.

¹⁰ Naga nasena sedade soldadomona jaíde. Jino jaillena, nanoca nasemo ride. Naí nasedí lloema íe; íadedí nase dama ecoride. Jino jaídíiaimaí. Daje calle jaillanona, jaíenici naimíena faínonocaíde.

¹¹ Íemona Pedro naimíemo suíde rafuena jaí uíñoacaíde. Raite:

—Cue Nama íe jaíenicina uanaí oretate. Herodemonona cuena jillobitade. Judíuaí illaícomíní cue meinellena cue sedajamona cuena jillobitade.

¹² Íena jaí naimíe uíñuano, María jofomo jaíde. Maríadí Juan Marcos eí. Jusiñamuímo jállena, naícomo ailluena comíní ofídímaci.

¹³ Rillanona calle fuemo íte nasena tute. Daje mullaiño bite. Naiñaiño mamecí dí Rode.

¹⁴ Naimíe uaiduamona, naiñaiño Pedro uaina uíñote. Íobilla jira, nase econoñede; íadedí abído fo aísíde. Pedro nasemo illana llote.

¹⁵ Raitímaci:

—Odí uaíríco ísoídíosa.

Naiñaiñodí:

—Pedrodí jaca íeseuíde —raite.

Uai uamona:

—Naimie joreño ite —raitimaci.

16 Pedro nasena nia tua jira, nasena econuaibitimaci. Econuamona naimiena naimaci cuamona, rajicaidimaci.

17 Fo jaillano, Pedro ie onolli jaidide, naimaci lliscaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiaí llono.

Ie mei Pedro jino jaillano, jiaínomo jaide.

18 Monaidemo, Pedro nainomo iñena jira, soldaduai rajicaillanona, siadotimaci.

19 Herodes iena fidiano, naimiena jenotate. Naimiena baiñena, soldaduaiimo jicanote. Baiñena jira, naimacina meinellena llote. Iemei Judea-mona Cesareamo Herodedi jaide.

Herodes micorí fiodailla rafue

20 Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote.

21 Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raíta, rafuena are llote.

22 Iena cacajano, comini ado cuiriidimaci:

—Jamai imadi ñaiñena. ¡Jusiñamui ñaia!

23 “Jusiñamuiñedicue” naimie raiñena jira, ieconi cai Nama jaienici naimiena iracotaitate.

Jusiñamuimo iobillacino naimie fecañena jira, aia naimiena aite. Iemona naimiedi fiodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiai uiga ucube illanona, Bernabé, Saulo diga, Jerusalémona Antioquíamo abido bitiaimaiai. Juan Marcos jiai atidiaimaiai.

13

Bernabéna, iaimaiai Saulo diga, fetua rafue

¹ Antioquíamo creyentiai motomo Jusiñamui facaina lloraini itimaci. Llofueraini jiai itimaci: Bernabé, Simón. Simóndi jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite.

² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaimaiai Saulo diga fetu, cuejena. Cue rafuena iaimaiai llollena, iaimaiaina jai fetodícue.

³ Jusiñamuimo naimaci jia mei, Jusiñamui iaimaiaina fetuana naimaci uñuamona, naimaci onolli iaimaiaimo jonia mei, iaimaiaina naimacimona oni oretatimaci.

Pablo, iaimaiai Bernabé diga, Chipremo illa rafue

⁴ Iaimaiaina Jusiñamui Joreño oretaja jira, Seleuciamon jaidiaimaiai. Nainomona botedo Chipremo jaidiaimaiai. Chipredi uiasi.

⁵ Chipremo ria, Salaminamo judíuai ofiracuaimo Jusiñamui uaina llofuetiaimaiai. Juan Marcos iaimaiai diga jiai jaide.

⁶ Nana naie uiasimo jaillanona, Pafos railla nairaïmo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraïma. “Jusiñamui rafuena lloticue” raite; iadedi taino lloraima.

⁷ Gobernador diga maijjuide. Gobernador di Sergio Paulo. Gobernador di abina uiñotimie. Jusiñamui uaina cacaacana jira, naimie Bernabé iaïmaïaï Saulo diga uaidote.

⁸ Barjesús ie jiaïe mameci Elimas. Naie iaïmaïaï llofuiana uaitate. Gobernador ñnuana jitaiñede.

⁹ Saulodi jiaïe mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona,

¹⁰ naimiemo llote:

—¡Eo jifueraïmadio! ¡Eo maraiñedio! ¡Taife ðibeïmo itio! Nana mare rafue ðibeïmo iñedio. Cai Nama ie mare uanaicïnona dobairaïdodio.

¹¹ Cai Nama ie uaido ona ja iracotaitaiticue. Nano nigarui useredinona cioiñeïtio.

Ieconï naimie cioiñede. Cominina jenuaide, ie onollido llinocaida ie uillena.

¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaite.

Jesús rafuena llocana jaidiaïmaïaï

¹³ Pafomona botedo Pablo ie nabaiñiaï diga jaide. Perge railla nairaïmo ride. Perge Panfilia railla enruemo ite. Juan Marcos iaïmaïaïna faïnonocaida, Jerusalémo abido jaide.

14 Pergemona Antioquíamo jaidiiaimaia. Pisidia railla eniruemo Antioquía ite. Sábadoruimo judíuai ofiracomo jaillano, ana raidiiaimaia.

15 Moisés micori cuegafuena facaja mei, Jusiñamui facaina lloraini micoriai cuegafuena facaja mei, judíuai ofiraco sedadino iaiaimaimo llotimaci:

—Caimaci, cominimo bue omico lloiacania, mai llono.

16 Pablo naidadajano, ie onollina jaidide, comini lliscaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaino judíuaiñedomoi; iadedi judíuai isoi Jusiñamuina sedadomoi. Cue lluomo mai cacarei.

17 Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadica. Naimiedi cai jaiagaina jaie fetode. Egip-tomo naimaci ia, naimacina eo jebuitate. Nain-omona ie siño uai diga naimacina atide.

18 Jofue iñenanomo cuarenta años naimacina canode.

19 Canaán eniruemo siete nairaina cuenode. Cai jaiagaimo, naimaci urui ai diga, naie eniruena fecade, naimaci iena.

20 Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitañedimaci. Samuel micoridi Jusiñamui facaina lloraíma.

21 Illaïmana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micoriaina sedade.

22 Naimie ifo meidollena, naimaci illaïmana illena, Jusiñamui David micorina fetode. Naimiedi Isaï micori jito. Jusiñamui naimie micorina llote: “Bimie eo cue comecido jaidimie. Nana cue jitaillerafuena finoite”.

23 Jusiñamui llua isoi, David micori uruiaïmona Jesúdi cai judíuái comini Jilloitaraïmana jaide.

24 Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona faïnonocaida, Jusiñamui ðibeimo omoi comeci iuaillai meido. Iena omoi meidoia, comini iena uiñotallena, mai omoi bautizallomoi”.

25 Juan micori ie llofua fuillamona, raite: “Omoi comeci facajamieñedicue. Cue ifomo jiaïmiena meidoite. Naimie isoïñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

26 'Caimaci, cai eirue jito Abraham micorimona comuidicai. Jusiñamuina birui sedadicai. Ie jira cai jeacinomona naimie jilloitalle rafue caïmo duide. Jesúna ñaiticue.

27 Jerusalémo itinodi, cai illaïcomini ðiga, Jesúna jaie meinetimaci. Naga sábado Jusiñamui facaina lloraini micoriai ciegafuiaïna facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai ciegafuiaïna jai suitatimaci.

28 Jesús marañede rafuena finoñede; iadedi naimiena meinetimaci. Pilatomo jïcanotimaci,

naimiena meinellena.

²⁹ Nana Jusiñamui facaina lloraini micoriai cuegafuiaina suilla mei, cruzmona naimie ana uano, nofici ie raiafomo naimiena jonetimaci;

³⁰ iadedi fiodaillamona Jusiñamui naimiena jil-lotate.

³¹ Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci.

³² Jusiñamui cai jaiagaimo jaie lloga rafue jai suide. Iena omoimo ja lloiticoco.

³³ Jusiñamuidi cai jaiagaimo llogafue birui jai suide. Jesúsna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona jilloitaraimana itataticue’”.

³⁴ Fiodaillamona Jusiñamui naimiena jai jil-lotate. Ie abi jaca rifaiñede. Iena Jusiñamui jai raita: “Davidmo cue llogacinona omoi facaina jaca finojiticue”.

³⁵ David micori jiaie salmomo iena cuete: “O mareuidimie jaca rifaillana jitañedio” raita.

³⁶ Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;

³⁷ iadedi Jusiñamui Jito abidi ie isoi rifaiñede.

³⁸ 'Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoina jillotañede;

³⁹ iadedi Jesúsna birui omoi ñnoia, omoi jeacino anamona jilloitomo.

40 Abina omoï rairui, Jusiñamui facaina lloraini micoriai jaie ciegafuiaï omoïmo sui raillano. Jaie cuetimaci:

41 Ero, Jusiñamui uaina jamaidomoi. Ieri raiji-caidomoi; iadedi faïfidomoi.

Omoï motomo siño mare rafuena birui finodïcue. Bu omoïmo iena iese lloia, bie rafuena ñnoñeitomoi.

Ie isoi omoïmo suiñellena, Jesúna birui omoï mai ñno.

42 Ie mei Pablo lliicaide. Iaimaiaï jino jaidemo, comini iaimaiaïmo jicanotimaci, jiaie sábadoruimo bie rafuena naimacïmo dane lloïllena.

43 Comini jino jailla mei, ailluena comini Pablo, iaimaiaï Bernabé diga, ñaicana jaidimaci. Judíuai iese jaidimaci. Judíuaiñedinno iese jiaï jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaimaiaï Bernabé diga, ñaicana jaillanona, naimacïmo llotiiaïmaiaï:

—Jusiñamui omoïna duenaillana omoï jai uiñua jira, Jesús rafuena mai omoï ñno.

44 Jiaie sábadoruimo ailluena comini ofidimaci, Jusiñamui uaina cacareïllena.

45 Ailluena cominina ciuano, judíuai comini dinena eo uradoidimaci. Pablo joreñona ñaitimaci. Naimie llofuiacïnuaina uaitatimaci;

46 iadedi Pablo, iaimaiaï Bernabé diga, jacitaiñeno llofuetiiaïmaiaï:

—Omoïmo Jusiñamui uaina nano lloiacadïcoco. Iena jitaïñedomoi. Jusiñamui diga omoï jaca illena jitaïñedomoi. Ie jira judíuaiñedinno dine jaiticoco.

47 Iese Jusiñamui jaie llote:

Judíuaiñedinomo ona oretaiticue, naimacïmo cue rafue lloïllena,

naga eniruemo ite cominimo jeacinomona jillu-
ana lollena.

48 Iena cacajano, judúuaiñedino iobidimaci.

—Jusiñamui rafue mare —raitimaci. Jusiñamui
jaca illena fetocano diese Jesúna ñnotimaci.

49 Nana bie eniruemo cai Nama Jesús uaina llo-
cana jaide;

50 iadedi judúuai dinena diga cominina fuemo
faicana uitimaci. Jusiñamuina sedade riñoniaina
fuemo faicana uitimaci. Naie riñoniai mameciai
are soride. Illaicomini fuemo faicana uitimaci.
Ie jira Pablo, iaimaiai Bernabé diga, duere
finodimaci. Naimaci illanomona iaimaiaina jino
dotadimaci;

51 iadedi jioracuai iaimaiai eillimona
jaidinotiaimaiai, naimacimo ite jeacinuaina
naimaci uiñollena. Ie mei Iconio raila nairaimo
jaidiaimaiai;

52 iadedi Antioquámo ite creyentiai eo iocire
itimaci. Jusiñamui Joreño nana naimaci comecimo
namatade.

14

*Iconiomo Pablo, iaimaiai Bernabé diga, illa ra-
fue*

1 Iconiomo judúuai ofiracomo, iaimaiai Antio-
quámo jailla isoi, jaidiaimaiai, Cristo rafuena
duere llotiaimaiai. Ie jira ailluena comini creyen-
tiaina jaidimaci. Judúuai cominimona ailluena
ñnotimaci. Judúuaiñede cominimona ailluena jiai
ñnotimaci;

2 iadedi ñnoñede judúuaidi judúuaiñedinona
fuemo faitimaci. Naimacimo creyentiaina tainona
llotimaci;

³ Iadedi nainomo are fiebidiaimaia. Cai Nama facaisena jacitaiñeno llotiaimaia. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci;

⁴ Iadedi nana comini naiena inoñedimaci. Comeciaina daje isoi lloisiñede. Damierie judíuai facaisena itimaci. Damierie naie iaimaia facaisena itimaci.

⁵ Judíuaiñedínodi, judíuai diga, naimaci illacomini diga, naie iaimaiaina duere finoacadimaci. Noficina iaimaiaina fairigiacadimaci.

⁶ Iena fidiano, Licaoniamo ite nairaímo aisicano jaidiaimaia. Listra railla nairaímo jaidiaimaia. Derbe railla nairaímo jiaí jaidiaimaia. Naie nairaí ecimo ite eniruemo jiaí jaidiaimaia.

⁷ Nainomo Jesús ie mare rafuena llofuetiaimaia.

Listramo iaímaiaímo suilla rafue

⁸ Listramo damie tisitaite. Nanomona naimie iese jeicia jira, jaca macariñede.

⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaitimie inote. Pablo dinena naimiemo eruaillano, naimie inuana uiñote.

¹⁰ Naimiemo ado llote:

—A naidada.

Iemei daiacaida naimie macarite.

¹¹ Ailluena comini Pablo finoca rafuena cioidimaci. Naimaci uaido ado cuiriidimaci:

—fiñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci.

12 Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira.

13 Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feacaadimaci.

14 Iaimaiiai iena ciuanona, “Comini marañede rafuena finoacade” raillano, iaimaiiai iniroina cuaranotiaimaiiai. Comini motomo aisicana jaidiaimaiiai. Ado llotiaimaiiai:

15 —Nabaiñiai, ¿bue ñellena cocomo iese finodomoí? Jamai imadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiai finode. Nana nainomo ite rana jiai finode.

16 Jaie Jusiñamuidi nana omoí judúuaiñedino omoí jitailla rafuena finuana rairuñede;

17 iadedi naimie finoca rafuemona naimiena uiñoredomoí. Omoí facaina mare rafue naimie finocabide. Noci deitate. Omoí riara sicotate. Omoímo guille itatate. Iemona omoí comeciaina caimare itatate. Iemona Jusiñamuina uiñoredomoí.

18 Iese Pablo llote; iadedi iaimaiaimo juraretaiaina fecajana jaca fainonocaiacaiñedimaci.

19 Nano nigarui illamona, Pisidiamo ite Antioquiamona judúuai comini bitimaci. Iconiomona jiai bitimaci. Judúuai dinena fuemo faiamona, naimaci dibeimo comini

jaidimaci. Iemona noficido Pablona fairigite. Naie nairaimona naimiena sonocana uitimaci, fioidaitimiena naimie eruailla jira.

²⁰ Naimiena iese faimonocaila mei, creyentiai naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide.

²¹ Naie nairaimo Jesús ie mare rafuena llotiaimaia. Diga comini creyentiaina jaidimaci. Ie mei Listramo abido jaidiaimaia. Iconiomo abido jia jaidiaimaia. Pisidiamo ite Antioquiamo jia abido jaidiaimaia.

²² Creyentiai comeciaina ocuiñotadiaimaia. Cristona nia inuana llotiaimaia. Raitiaimaia:

—Jusiñamui dine cai nia riñenia, eo duere sefuitica.

²³ Naga creyentiai illanomo creyentiaina sedarainina fetodiaimaia. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina faimonocaidiaimaia.

Siriamo ite Antioquiamo abido jaidiaimaia

²⁴ Pisidiamo jaillanona, Panfiliamo ridiaimaia.

²⁵ Pergemo Cristo uaina llua mei, Ataliamo jaidiaimaia.

²⁶ Nainomona botedo Siriamo ite Antioquiamo abido ridiaimaia. Nano naie iaimaia illanomo abido ridiaimaia. Nainomona iaimaia navui nia jaiñenia, creyentiai dinena Jusiñamui iaimaiaina duenaillana uiñuamona, iaimaiaina oredimaci. Jusiñamui rafuena iaimaia lollena, iaimaiaina oredimaci. Naie maijia fuilla jira, jai abido bitiaimaia.

27 Iaímaiaí rilla mei, creyentiaína ofitatiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuaíñedino naimiena inuana jai jitaide —llotiaímaiaí.

28 Dinomo creyentiaí diga are itiaímaiaí.

15

Jerusalémo Moisés micori llogacina siadua rafue

1 Antioquíamo Jerusalémona janore comini bilano, creyentiaína iese llofuetimaci:

—Moisés micori caimo llua isoi, omoi abina omoi detatañenia, jeacina mona jillobiñeitomoi.

2 Ie jira creyentiaí uri inedimaci. Pablo, iaímaiaí Bernabé diga, Jerusalémona bitino llofuiana eo uaitatiaímaiaí. Ie muidona creyentiaí dinena iaímaiaína, jiaie creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaína sedaraini diga, bie rafuena siadoiacasite.

3 Creyentiaí naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jiaí jaidimaci. Creyentiaí illanuaímo llofuecana jaidimaci. Judíuaíñedino creyentiaína jai jaillana naimacimo jiaí llotimaci. Ie jira naie creyentiaí caimare itimaci.

4 Jerusalémo ria, creyentiaídi naimacina feiñotimaci. Cristo oretagano itimaci. Creyentiaína sedaraini jiaí itimaci. Naimacimo nana Jusiñamui iaímaiaímo finoca rafuena llotiaímaiaí. Cristo rafuena iaímaiaí llofuia mona, judíuaíñedino Cristona inuana llotiaímaiaí.

5 Iena cacajano, fariseuai dibeimo ite creyentiaimona jiaino naidaita raitimaci:

—Moisés micori llogacinuaina inuamona, judíuaiñede creyentiaí abina diana jitaídicaí.

6 Bie rafuena siadollena, Cristo oretaganodi, creyentiaí sedaraini diga, danomo ofidimaci.

7 Iena are siadua mei, Pedro naidacaillano, raite:

—Amatiai, judíuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona inotimaci.

8 Nana comini comeciaina naimie uiñuamona, judíuaiñedino naimiena inuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judíuaiñedinona jitaillana jai uiñoticaí.

9 Jusiñamuidi naimacina cai isoi jai feiñote. Naimiena naimaci inua jira, naimie naimaci comeciimona jeacinona jai dotade.

10 ¿Bue ñellena Jusiñamuina inoiacaiñedomoi? Jusiñamui jitaillacino omoi finoacaiñena jira, naimie omoína duere finuana jitaídomoi. Cai jaiagai Moisés micori llogacinodo jaidimaci; iadedi iena raise inoñedimaci. Nana ie llogacinona jaca finonidimaci. Iedo jaie jiaí jaidicaí; iadedi iena jiaí finonidicaí. ¿Bue ñellena iedo birui cai jaillana jitaídomoi?

11 Jesucristo caina duenaila jira, cai jeacinomona jilloiticaí. Judíuaiñedino cai isoi jilloitimaci.

12 Iena cacajano, nana ofidino uai llucaidimaci. Iemei Bernabé lluana cacadimaci. Pablo lluana

jiaí cacadimaci.

—Jusiñamui judíuainēdino motomo cocona siño rafuena finotate —lloṭiaimaiaí.

¹³ Iaimaiaí ñaia mei, Jacobo raite:

¹⁴ —Amatiai, cuemo cacarei. Judíuainēdino Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode.

¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micori illaima isoi illaimana illena, cue Jitona ico oretaiticue.

David jicori jito illaimana birui iñede;

iadedi David micori ifomo illaimana cue Jito iite.

Iemona judíuainēdino cuena ñnoitimaci.

Naimaci cue cominina jaillena jiaí jitaídicue.

Iena cue llua jira, iena finoíticue” llote.

¹⁹ Ie muidona cue comeci raite: Judíuainēdinomona creyentiaína jaidinona duere finoñeiticaí.

²⁰ Naimacimo rabena oreta, dama buena lollena: “Jiraraimo fecaca llicisina riñeno. O aiñede riño diga iñeno. O iniñede iima diga iñeno. Llerinoga rana riñeno. Diruena jiaí riñeno”.

²¹ Jaiemona naga sábado naga judíuái ofiracomo judíuáidi Moisés micori cufafuaimona naie isoide lletarafuena cacadimaci. Ie jira naie isoide rafuedo nia jaiticaí: iadedi jiaie Moisés micori lletarafuedo jaiñeiticaí.

²² Ie mei Cristo oretaganodi, creyentiaína sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano:

“Jee” raitimaci. Pablo, iaímaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiaí fetodimaci. Jiaie comini baífemo rafuena baitadiiaímaiaí.

²³ Rabena cuetimaci, iaímaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoímo cuetícaí. Jerusalémo itícaí. Cristo oretaganodícaí. Creyentiaina sedarainídícaí. Omoídi caí amatícaí. Omoímo jai cuetícaí. Judíuaíñediomoi; iadedi caí amatíaidomoi.

²⁴ Caí motomona jiaie comini naimaci llofuiado omoína uri itatañenana fidídícaí. Omoí jeacinomona omoí jilloillena, Moisés micorí llogacinodo omoí jaillana jitaídícaí. Ie jirari omoí comecícaí rucaicuerite. Naimacina oretañedícaí.

²⁵ Danomo caí ofilla mei, menamiéna fetodícaí, omoímo oretallena, Bernabé, iaímaiaí Pablo diga. Bernabéna isiruitícaí. Pablona jiaí isiruitícaí.

²⁶ Iaímaiaí caí Nama Jesucristo muidona navui niadedi fiódaitíiaímaiaí.

²⁷ Ie jira Judas, iaímaiaí Silas diga, oretaitícaí. Omoímo bie rabe cuia isoi lloitíiaímaiaí.

²⁸ Jusiñamui Joreño caímo illamona, bie rafuena omoímo lloitícaí. Ailluena rafue omoí finuana lloñeitícaí. Dani bie rafuena finojitomoi.

²⁹ Jiraraimo fecaca rana riñeno. Diruena riñeno. Llerinoga rana riñeno. O añede riño diga iñeno. O iniñede ima diga iñeno. Iese omoí iñenia, marena iitomoi. Macaibaite” cuetimaci.

³⁰ Ie mei Antioquíamo jaidícaí. Ailluena comínina ofitaja mei, naimacimo cartana

fecadimaci.

³¹ Iena facajano, naie lluacinori iobidimaci.

³² Judas Jusiñamui facaina lloraima. Silas daje isoide. Diga rafuena creyentiaimo llofuetiaimaia. Naimaci comecina jia ocuiñotadiaimaia.

³³ Diga irui nainomo illa mei, iaimaiaina oretatinomo creyentia iaimaiaina marena abido oretatimaci.

³⁴ Nainomo Silas comecina facajano, fiebide. Ie jira Judas dama abido jaide.

³⁵ Antioquiamo Pablo, iaimaia Bernabé diga, cai Nama Jesús rafuena llofuellena fiebidiaimaia. Diga comini jia iese llofuetimaci.

Pablo jiaie enruemo ite creyentia dine dane jailla rafue

³⁶ Diga irui illa mei, Pablo Bernabémo llote: p—Naga navui coco llua nairaimo creyentia dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaimaia diga, Juan Marcos uiacade.

³⁸ Panfiliamo iaimaiaina navui Juan faionocaide. Iaimaia diga llofuellena jaiñena jira, Pablo naimiena dane uiacaiñede.

³⁹ Riire ñaitiaimaia. Comecina daje isoi lloñediaimaia. Ie jira dajena jaiñediaimaia. Bernabé Juan Marcona uillanona, Chipremo aillue botedo jaidiaimaia.

⁴⁰ Ie mei Pablo Silana uite. “Jusiñamui omicono canoite” creyentia dinena raillanona, iaimaiaina oredimaci.

⁴¹ Siria railla eniruemo Jesús rafuena llocana jaidiiaimaia. Cilicia railla eniruemo jia llocana jaidiiaimaia. Creyentia comeciaina ocuiñotacana jaidiiaimaia.

16

Timoteo iaimaia diga jailla rafue

¹ Nano Derbemo Pablo, iaimaia Silas diga, ridiiaimaia. Iemona Listramo ridiiaimaia. Nainomo Timoteo railla creyente ite. Naimie eidi judia iñaño. Jia creyente. Ie moo micoridi griego imie.

² Listramo ite creyentia, Iconiomo ite creyentia diga, naimiena: “Mare” raitimaci.

³ Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judiua illa jira, Moisés micori llua isoi, Pablo Timoteo ie abina dete. Juduñedimie naimaci motomia, naimaci motomo inide.

⁴ Naga nairaimo naimaci jaillanona, Jerusalémo siadogacinona creyentiaimo llote. Jerusalémo Cristo oretagano, creyentiaina sedaraini diga, navui naicinona siadotimaci. Creyentia naie lluaana inollena, iena llocana jaidimaci.

⁵ Ie jira creyentia inocana jaidimaci. Nagarui ailluena comini creyentiaina jaidimaci.

Pablo nicarilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci.

7 Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide.

8 Ie jira Misiamona ecido jaillano, Troas railla nairaimo jaidimaci.

9 Nainomo naie naiona Pablo nicairilla ra isoidena cide. Daje Macedonia imiedi uicomo naidaita naimiemo jica-jicanode. Raite: “Macedoniamu ruica o bi. Caina canuaibi”.

10 Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uinoticue, iena omo cuellena. Macedoniamu ruica dine cai jaille botena jenodicai. Comecina facadicai: “Jusiñamuidi caina uaidote, nainomo ie mare rafuena cai llollena”.

Filipomo illa rafue

11 Ie jira Troamona Samotraciamu monaillaido atona ie mamedo jaidicai. Ie icoitidiruido Neápolis railla nairaimo ridicai.

12 Dinomona Filipomu duide naisodo jaidicai. Macedoniamu ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomu iticai.

13 Sábadoruido naie nairaimona nasedo jino jaidicai. Comecina facajamona: “Dinomu nibai comini oficabidimaci, Jusiñamuimo jillena”, ille fuemo jaidicai. Nainomu dañaiñorie riñoniai bilanona, dinomu ana raicai, naiñaiñuaimo Cristo rafuena llollena.

14 Naimacimona dañaiño cai llofuiana eo cacadu. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño

comeci naie lluana feiñotade. Naie facaise creyentena jaide.

¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai iñuana omoi uiñuamona, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamui jiranomo jiaruido jaidicaimo, daje jitaiño dafaidicai. Naiñaiñodi jainomona ibacañaiño. Janaba anamo naiñaiño jiai ite. Iemona naiñaiño jiaruido suille rafuena llouide. Naie rafuena lluana ibatajano, naiñaiño namaiaidi ailluena ucubena feiñouidimaci.

¹⁷ Naiñaiñodi cai jinafona jaillanona, ado cuiricuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño lluamona ucubena jai oñenana naiñaiño namaiai jai uiñua jira, Pablo, iaimaiai Silas diga, gaitadimaci. Iaimaiaina plazamo illaicomini illanomo sonocana uitimaci.

²⁰ Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediaimaiai. Iaimaiai judíuai comini.

²¹ Romanuai cominina cai illa jira, iaimaiai llogacinuaina cai iñoia, iedo cai jaia, marañede.

²² Iena cacajano, nana comini naie iaimaiaina fanaisitimaci. Illaicominidi naie iaimaiai iniroina

cuaranuanona duiñode. Rasi diga, iaímaiaína diga icaiño fatatati maci.

²³ Iaímaiaína eo faja mei, cárcelmo joneti maci. Cárcelna sedaraimamo iaímaiaína raise sedallena lloti maci.

²⁴ Iese llua jira, iaímaiaína llaveracomo fo iaímaiaína uite. Donoramo iaímaiaí eilliaí ñuitajano, raise donode.

²⁵ Naíona daferui facai Pablo, iaímaiaí Silas diga, Jusiñamuimo ifuerillacinona ro-rodiaímaiaí. Jiaí jüdiaímaiaí. Jiaíe llavecano naíena cacadi maci.

²⁶ Jamai ebena illacinomona ñuisañodi suide. Cárcel illanodi jaidi site. Naíe facaiseconi nana nasiaídi ecocorinaite. Ie dacaiño nana llavecano imaci donua radi oni ecoride.

²⁷ Cárcelna sedaraima casidemo, cárcel ie nasiaí ecocorinaillana ciode. “Llavecano jai aisidi maci” raillamo naimie começina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona começina facade;

²⁸ iadedi Pablodi eo riire cuiριοide:

—¡O abina dama meineño! Bene nana iticaísa.

²⁹ Lamparína atillena cárcelna sedaraima jicajanona, jarire fo jaide, Pablo iaímaiaí Silas dine. Jacinaillano, naimie abidi docaillamona, iaímaiaí uicomo cañici ifodo ana rainadate.

³⁰ Iaímaiaína jino ua mei, nai iaímaiaímo jicanote:

—¿Buena finojiticue, cue jecinomona cue jilloil-lena?

³¹ Uai otiaímaiaí:

—Coco Nama Jesúsna ñno. Iese na o jofomo ite comini diga o jilloillesa.

32 Iemei naimiena Jesús ie rafuena llofuetiaimaiai, nana ie jofomo itino diga.

33 Naie facaise iaimaiai bofellaña jocode. Iemei naimiedi, nana ie comini diga, bautizaga.

34 Guillena, ie jofomo naie iaimaiaina uite. Jusiñamuina jai inua jira, na ie comini diga, naimie camare ite.

35 Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena.

36 Cárcel sedaraimadi naie rafuena Pablomo llote. Raite:

—Omico jaillena, illaicominidi omicono oredimaci. Mai marena jai.

37 Iadedi policíamo Pablodi llote:

—Cocodi romanuai cominidicoco; iadedi como ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

38 Illaicominimo policías naiena lluaibitemo, illaicominidi naiena cacajanona, eo jacinaita, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci.

39 Ie jira naie iaimaiai dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaiai jaillena oredimaci.

40 Cárcelmona jino billano, Lidia jofomo fo jaidiaimaiai. Creyentiaina ciuano, naimaci comeciaina ocuiñotallena, naimacina dane llofuetiaimaiai. Ie mei oni jaidiaimaiai.

17

Pablo, iaímaiaí Silas díga, Tesalónicamo illa rafue

¹ Anfípolis railla nairaímo macaritiaímaiaí. Apolonia railla nairaímo macaritiaímaiaí. Ie mei Tesalónica railla nairaímo ridiaímaiaí. Dínomo judíuaí ofiracodí ite.

² Pablo fibilla isoi, nainomo fo jaide. Daje amani sábadoruimo Jusiñamuina cuezafuiaímona naimacína llofuate.

³ Iese naimacína llofuate:

—Cristo llegí cacaite. Fiodaillamona naimie jilloite. Naimiedí Jesús.

⁴ Naiena cacadinomona ailluena ñnotimaci. Pablo, Silas iaímaiaí díbeimo jaidimaci. Jusiñamuina ñnote grieguaimona ailluena comini creyentiaína jaidimaci. Ie emodoconi ailluena nanocañaiñuaídi creyentiaína jiaí jaidimaci;

⁵ Iadedí judíuaídi uradoillano, jamai itinomona eo marañede iñiaína uaiduanona, ailluena cominina ofitatimaci. Ie jira naie nairaí uri iñedimaci. Iaímaiaína comini uicomo uillena, Jasón jofomo binaisite.

⁶ Iaímaiaína baiñenano, Jesóna, jiaie creyentiaí díga, illaícomini illanomo aiñoicaída uitimaci. Cuirriisite:

—Naga nairaímo cominina uri itatañediímaiaí. Benomo jai bitiaímaiaí. Jai benomo billanona, Jasón ie jofomo iaímaiaína feiñote.

⁷ Cai nanoca illaíma ie llogacinona jai ñnoñedimaci. Ie anamo jai iacaiñedimaci. Raitimaci: “Jiaie illaíma anamo iticai. Jesús raillamie anamo iticai”.

⁸ Judúuai iese lluamona, cominidi uri iñedimaci. Illaicominidi jiaí uri iñedimaci.

⁹ “Naie iaímaiaí dane biñeitíiaímaiaí” illaicominimo creyentiaí raillano, illaicominidi Jasón jiaíe creyentiaí díga, jino oretatimaci.

Bereamo Pablo, iaímaiaí Silas díga, illa rafue

¹⁰ Naie naío creyentiaídi Pablona, iaímaiaí Silas díga, Bereamo raire oretatimaci. Dinomo rillano, judúuai ofiracomo jaidíiaímaiaí.

¹¹ Nainomo ite judúuai eo mare. Tesalónicamo ite judúuai isoiñedimaci. Bereamo itinodi Cristo rafuena iocíre feiñotimaci. Níedi uanaicínoni raillanona, nagarui Jusiñamuina ciegafuíaína facadimaci.

¹² Ie jira naimacimona ailluena inotimaci. Judúuaiñedinomona ailluena nanocañaiñuái inotimaci. Ailluena iñiaí jiaí inotimaci;

¹³ iadedi Bereamo Pablo Jusiñamui ie uaina jai lluana Tesalónicamo ite judúuai di fidiano, dinomo jaidimaci. Cominina fuemo faillena, jaidimaci.

¹⁴ Naie facaise creyentiaídi Pablona oni oretatimaci. Monailaí fuemo duide naísona oretatimaci. Silas, iaímaiaí Timoteo díga, fiebidíiaímaiaí.

¹⁵ Pablo uigamací naimíe díga Atenamo jaidimaci. Dane abído Bereamo jaidimacimo, naimacimo Pablo llote:

—“Silas, iaímaiaí Timoteo díga, raire cue díne billesa” llono.

Atenamo Pablo illa rafue

¹⁶ Atenamo iaímaiaí rillena Pablo sedademo, naie naíraimo ailluena jiraraíaina cíode. Iena cíuanona, Pablo comecídi jeareficaíde.

17 Naiena cıua mei, judıúuai ofiracomo judıúuai dıga coniniri Jusiñamui rafuena siadote. Jusiñamuina jai ñnote judıúuaiñedino dıga coniniri iena jıai siadote. Plazamo nagarui jamai itino dıga coniniri iena jıai siadote.

18 Jamai comecina facadinomona damierie naimie dıga jıai ñaitimaci. Epicúreo railla rafuedo jaisoidimaci. Estoico railla rafuedo jıai jaisoidimaci. Damierie naimacimona raitimaci:

—¿Buena nai ñaıllareuidimie caımo lloiacade?

Jıaino raite:

—Jıaie nairai jusiñamuıllaıcaımo lloiacade isoide.

Jesús fiodaıllamona jılluana Pablodı llouılla jira, ıese raitimaci.

19 İe jira naimiena naimaci siadouıllanomo uıtimaci. Naie illano Areópagona mamecırede. Jıcanotimaci:

—¿Nie isoide o comocınuai? Caımo llono, caı uıñollena.

20 Eo feiredıcinuaina cacadıcaı. ¿Buena nai llofuiacınodı llote? İena uıñoıacadıcaı.

21 Nana Atenamo ite cominı, jıaie illanomona bitino dıga, jamai aıllı como imaci fıdıa rafuena ñai-ñaidimaci. Jamai aıllı fıdıa rafuena cacacadıimaci. Jıaie rafuena fınoñedimaci.

22 Jıcanua mei, Areópago railla illanomo Pablo nıdadacıda llote:

—Atenas imaci, omoımo rafuena lloıacadıcue. Omoı jusiñamuıllaına eo sedacabıdomoı.

23 Cue macarıllamona, omoı jusiñamuıllaına sedaja jıraraina cıodıcue. Daje jırarai abımo ıese cıega: “Uıñoñega Jusiñamuına sedadıcaı”

cuega. Uiñoñoeno naimiēna sedadomoi. Ja omoimo naimiēna lloiticue.

²⁴ Jusiñamui biniēna jaie finode. Ie emod-
oconī Jusiñamuidi nana biniēmo itinona jiai finode.
Naimiedi mona ie Nama. Enirue ie Nama. Ie jira
iima finoca jofomo naimie iñede.

²⁵ Naga jitaille rana naimiēmo illa jira, naimiēna
canonidicai. Naimie nana cominina comuitate.
Jiai nagarui jafaici cai uadi caimo iga. Uanai nana
rana caimo iga.

²⁶ Damiedemona nana cominina jebuitate, nana
eniruēmo naimaci illena. Naimaci illa dinori
naimie jonega. Naimaci illanomo naimie jiai
jonega.

²⁷ Iese jonega, naimaci naimiēna jenollena. Jen-
uano, nibai naimiēna baitimaci. Caimona naimie
are iñede.

²⁸ Naimie jaca illa jira, cai jiai iticai. Jiai cajedicai.
Ie isoi omoi rafue lloraini jiai llotimaci: “Naimie ie
uruiadicaī”.

²⁹ Naimie caina comuitaja jira, Jusiñamuidi ji-
rarai isoiñedena uiñoticaī. Jusiñamuidi oromona
finoca ra isoiñede. Platamona finoca ra isoiñede.
Noficimona finoca ra isoiñede. Iima ie onolli diga
finoca ra isoiñede.

³⁰ Cominidi abi uiñoñoeno jeacino jaie
finouidimaci. Jusiñamui naimacina nia janafeñede;
iadedi jai birui Jusiñamuidi nana cominina naga
illanomo naimaci comeciai iuai meidollena
jitaide.

³¹ Naimaci comeciai iuai naimaci meidoñenia,
naimie jai lloga facaise, naimacina duere finoite.
Naimacina duere finollena, ie Jitona jai fetode.
Naimaci finoca rafuena naimie raise uiñuamona,

naimacina duere finoite. Fiodaillamona Jesúsna naimie jai jilloitaja jira, iena uiñoticaí.

³² Fiodaillamona Jesús jilluana cacajano, damierie jaisitimaci. Ieconí jiaínodí raite:

—Jiaíruido o lluana dane cacajiticaí.

³³ Iemei naimaci motomona Pablo jino jaide.

³⁴ Naie cominimona damierie naimie díbeimo jaidimaci. ñnotimaci. Naimacimona damie Areópagomo siadoudimie. Ie mamecídí Dionisio. Jiaíñaiño ñnote. Naiñaiño mamecídí Dámaris. Daje facaiseconí jiaie cominídí ñnotimaci.

18

Corintomo Pablo illa rafue

¹ Atenamona Corinto railla nairaímo Pablodí jaide.

² Nainomo Aquila raillamiena baisaide. Naimiedí judío imie. Ponto railla eniruedí naimie comuillano. Ie aí mamecídí Priscila. Naiñaiño díga Romamona como bitiaímaiaí. Romamona Claudio nana judíuaí cominina jai oretate. Ie jirari bitiaímaiaí. Roma ie nanoca illaímadí Claudio.

³ Pablo iaímaiaí daje isoi maijia jira, Pablo iaímaiaí jofomo fiebide. Iaímaiaí conima díga maijide. Chivos itiraiaí ie nilla iniroina tiferisoidimaci, naiemona jofona finollena.

⁴ Naga sábadoruimo judíuaí ofiracomo llofuede, judíuaína ñnotallena, judíuaíñedinona iena jai ñnotallena.

⁵ Macedoniamona Silas, iaímaiaí Timoteo díga, bitemo, Pablodí nagarui Jusiñamui uaina llofueuide. Judíuaímo: “Jesúdí cai jilloitaraima” llouide;

⁶ ia naimie uaina inosinidimaci. Jiai naimie jinafomo jeare ñaitimaci. Naimaci comeciai jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judíuaiñedino dine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina inouidimie. Ie jofu judíuai ofiraco ecimo ite.

⁸ Crispodi, nana ie jofomo itino diga, cai Nama Cristona inote. Naimiedi judíuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga.

⁹ Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiño. Faicaiño cue rafuena llocana jai.

¹⁰ O diga iiticue. Budi ona maraiño finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiaide. Naie facaise Acaya ie gobernordi Galión. Naie facaiseconi damierie judíuai comini Pablona faiacadimaci. Galión dine naimiena uitimaci.

¹³ Raitimaci:

—Cai illaíma llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndi llote:

—Judíuai, cacarei. Naimie marañede rafuena finodena, naimie omoína jifuetena, omoi llumonia cacarefidicue;

¹⁵ iadedi jamai naimie uaillai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacínuaína cuemo jiai llotomoi. Iena omoi coniniri siadotomoi. Bie isoide rafuena siadoiacañedicue.

¹⁶ Iemona naimiedi nainomona naimacina oni orede.

¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibañede.

Antioquiamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaína facaduano, Priscila iaímaiaí Aquila diga, Siria railla eniruemo botedo jaide. Ie uai raise finuana uñollena, Moisés micori llua isoi, Cencreamo rillano, ie ifogina rijiruda garetate.

¹⁹ Efesomo rillanona, iaímaiaína fainonocaide. Judíuai comini Jusiñamui rafuena siadollena, Pablodi judíuai ofiracomo fo jaide.

²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue—

²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide.

²² Cesareamo sijiano, Jerusalémo macarite. Creyentiaí dine jaide. Ie mei Antioquiamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite.

Nana creyentiaí imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandra railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai ciegafuiaí raise uiñote.

²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiaí uiñoñede.

²⁶ Judíuai ofiracomo naimie llofuaí, jacitaiñeno llofuate. Priscila, iaímaiaí Aquila díga, naiena cacadíaimaiaí. Ie jira naimiena oni eneno uitíaimaiaí. Ie uiñoñega rafuena eo raise naimiena llofuetíaimaiaí.

²⁷ Acayamo Apolodi jaiacana jira, creyentiaídi naimie comecina ocuiñotajano, naimiena oresite. Acayamo ite creyentiaímo rabemo cuetimaci. Jusiñamui naimacina dueruilla jira, creyentiaína jai jaidimaci. Naimiena marena feiñollena iese cuetimaci. Nainomo naimie rillanona, creyentiaína eo canode.

²⁸ Judíuai díga marefodo jiaí eo ñaite. Iemona naimaci uai ollinodi iñede. Naimiedi Jusiñamui ciegafuiaímona Jesúdi caí Jilloitaraimana llofuate.

19

Efesomo Pablo illa rafue

1 Corintomo Apolo nia itemo, nairaiaí onifedo joide naído jailla mei, Pablo Efesomo ride. Dinomo rillanona, creyentiaína baite.

2 Naimacimo jıcanote:

—¿Cristona omoi ĩnuaruimo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicai.

3 Dane jıcanote:

—¿Nie isoi omoi bautizagaomoi?

Uai otimaci:

—Juan mıcorı lloga rafue facaina bautizagacai.

4 Pablo uai ote:

—Mare. Juan llote: “Omoi comeciaı iuaina meido. Iemei bautizallomoi”. Ie ifo meidoitimıena comıni ĩnollena llote. Jesúna ĩnollena llote. Jesús rafuena omoiımo raise lloiticue.

5 Iena cacajano, cai Nama Jesús dıbeido bautizadımaci.

6 Naimacimo Pablo ie onollına joniamona, Jusiñamui Joreñona feiñotımaci. Ie mei naimaci uiñoñega nairaı uaido ñaitımaci. Jusiñamui Joreño naimacimo llua rafuena jiaı llotımaci.

7 Nıbaı nana naimacıdı doce iıñiaı.

8 Sábadoruimo judıuaı ofiracomo fo jaillano, naimie anamo naimaci illana Jusiñamui jitailla jira, Jusiñamui dıbeimo naimaci comeciaı iuaina meiduana Pablodı jacıtaiñeno eo llouide. Nainomo daje amani fıvui fıebide.

9 Naimacımona jiaınodı Pablo uaina uaitatımaci. Jiaı ĩnoiacaiñedımaci. Naimaci ĩnoñena ira, ofiracomo bitınomo: “Cristo rafuedı maraiñede” llouidımaci. Ie jira Pablodı creyentiaı

diga naimacimona eneno oni jaide. Tiranno ie lloracomo nagarui Pablodí llofueuide.

¹⁰ Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidí Pablona siño rafuena finotate.

¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodí jillodimaci. Janaba anamo itinodí jiai jillodimaci.

¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo lua isoi, Jesús muidona bimacimona oni jai.

¹⁴ Esceva ie siete jitotiaidi iese finoacadimaci. Escevadí Jusiñamui diga ñairaima.

¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

¹⁶ Ieconí Janaba anamo itimie naimaci emodomo daiacaide. Raire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

¹⁷ Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci.

18 Ie jira ailluena creyentiaidi billano, imaci navui marañede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci.

19 Ailluena icorilla rafuia; illabia; atianona, marefodo jobaidimaci. Niga raifi rabia; jobaillana facadimaci. Cincuenta mil ucube diese facai rabiaina jobaidimaci.

20 Cai Nama Jesús uaina eo llocana jaide. Cominidi naie uai siñonana uiñotimaci.

21 Naie rafue illa mei, Pablodi comecina facajano raite: “Macedoniamos cue macarillamona, Acayamos cue jia; macarillamona, Jerusalémo riacadicue”. Ie emodoconi naimiedi raite: “Nainomona Romamos jia; jaicadicue”.

22 Naimie nia Asiamos nano nigarui illanona, mena canoramana Macedoniamos oretate. Timoteona, iaimaia; Erasto diga, oretate.

Efesomo ite comini marañede rafue finoacadimaci

23 Naie facaiseconi Pablo nia oni jaiñenia, Jesucristo rafue muidona Efesomo ite cominidi marañede rafuena comuitatimaci.

24 Demetrio raillamie platamona diga rana finouide. Naimiedi Diana ie jofo joreñuaina finouide. Naimie anamos ailluena maijuidimaci. Dianadi naimaci jusiñamui.

25 Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi;

26 iadedi Pablo raillamiedi diga cominina jai llofuede: “Comini finoca raniaidi jusiñamuillañede”. Naie llofuiamona ailluena comini naimie dibeimo

jaidimaci. Dama Efesomo iese suiñede; iadedi ua nana Asiamo iese suide.

²⁷ Ie jira abina rairuiacadicaí, caí majille faifi raillano, comini Diana jofona jiaí sofei raillanona. Cominidi naiñaiñona ebiruillana feitaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadicaí.

²⁸ Iena cacajano, eo iciritimaci. Riire cuiroidimaci:

—¡Efeso ie Diana eo ebirede!

²⁹ Danirie siadamona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaímaiaí Aristarco diga, gaitajano uitimaci. Naie iaímaiaídi Pablo ie nabai iaímaiaí. Iaímaiaí comuillanodi Macedonia.

³⁰ Pablo ofiracomo jiaí fo jaiacade; iadedi creyentiaídi naimie fo jaillana rairuidimaci.

³¹ Illaicominimona damerie nabaiñiaí naimiemo fo jaillana jiaí rairuidimaci.

³² Fo itinomona damerie daje rafuena ebena cuiroidimaci. Jiaíno jiaífuena ebena cuiroidimaci. Eo failliñaidimaci; ie iadedi bue ñellena naimaci ofillana raise uiñoñedimaci.

³³ Comini motomona judíuaí dinena damie uicomo oredimaci. Ie mamecidi Alejandro. Cominina llícaitallena, ie onolli jaidianona, cominimo lloiacade;

³⁴ iadedi naimie judío imiena naimaci uiñuanona, nana daacaiño cuiroidimaci. Mena horas raifi cui-roiroidimaci:

—¡Efeso ie Diana eo ebirede!

³⁵ Iemei naie nairaí rabe cueraímadí comínina llícaitatate. Naimaci llícailla meinoconi, naimíe lluacínona cacadímaci. Raite:

—¡Cacarei! Cai nairaídí Dianana sedacabidícaí. Naiñaiño ebiredíñaiño. Naiñaiñoña eruai de jiraraídí monamona jaie uaide. Iena jiaí sedacabidícaí. Nana bie eníruemo ite comíní iena uíñotímaci. Bu naiena uíñoñedímiena jaca íñede.

³⁶ Bu cue lluana jaca uaitañeite. Ie jira omoi llícaí. Comeciaí facañeno buena finoño.

³⁷ ¿Bue ñellena Gayo iaímaiaí Aristarco díga, benomo atídomoi? Iaímaiaídí cai jusíñamui joreñoña ñaíñediímaiaí. Naiñaiñoña jeare finoñediímaiaí.

³⁸ Demetrio, ie maíjirainí díga, iaímaiaína llogídoiacania, comínina llogídoraco ite. Díga jueces jiaí ite. Coniniri nainomo iena siado;

³⁹ iadedí jiaí nicino omoímo ia, cai illaícomíní ofía, buena siaduanó, caímo lloítímaci.

⁴⁰ Biruí bie rafue cai finua jira, illaícomíní níbaí caina duere finoítímaci. ¿Ñiese cai níbaille? Illaícomíní caímo buena jicanoía, ¿ñiese raitícaí?

⁴¹ Naie llua mei, ofidínona jino orede. Iemei jai jono tuudímaci.

20

Macedoniamó Pablo dane jailla rafue

¹ Efesomo ite rafue suilla mei, Pablodí creyentíaina uaidote. Naimaci comeciaína ocuíñotafuena llote. Iemei naimacína naimíe facaduanó, Macedonia railla eníruemo jaide.

² Nainomo ite nairaíaímo macarite. Comecína ocuíñotallena, naimacína llofuecana jaide. Iese Macedoniamona Grecia railla eníruemo risaide.

³ Nainomo daje amani fivui illa mei, Siriamo botedo abido jaiacade; iadedi judíuaidi naimiena meineiacanana Pablo fidiano, Macedoniamo abido macarite.

⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaímaiaí Segundo diga, jaide. Tesalónica nairai imie iaímaiaí. Gayo naimie diga jiaí jaide. Gayodi Derbe nairai imie. Timoteo naimie diga jiaí jaide. Tíquico, iaímaiaí Trófimo diga, jiaí jaidíiaímaiaí. Asia imie iaímaiaí.

⁵ Coco uicodo naimaci jaillano, Troamo cocona sedadimaci.

⁶ Llomenico guillaruillaí railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaífidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caína llofujete. Icoiti naimie jaiacana jira, Pablo are ñaíte. Naiona jitoma daferui illa facai nia ñaíte.

⁸ Cai ofillanomo ailluena lamparíniaí ite.

⁹ Pablo are ñaía jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a itícaí. Nainomona eniruemo naimiedi uaide. Ana jibuisaíbidemo, naimiena meniñocaidemo, naimie jai fiodaillana ciódimaci.

¹⁰ Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoi rucaicuериñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana comecellona, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide.

¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodi Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai.

¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaimo jaidicai.

¹⁵ Nainomona dane monaillaido cai jaillano, ie areruido Quío railla nairaimo ruicafebellemo jaidicai. Dane ie areruido Samos railla nairaimo mamedo atona jaidicai. Ie areruido dane cai jailano, Miletomo sijidicai.

¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoni, cincuenta digarui illanona bie rafue ite. Asia railla eniruemo naimie are iacaiñena jira, Pablo comecina facade: “Efeso ecido monaillaido jaiticai”.

Efesomo ite creyentiai sedarainimo Pablo llua rafue

¹⁷ Creyentiaina sedarainina uaidollena, Miletomona Efesomo Pablo cartana orede.

18 Naimie dine naimaci rillanona, Pablo naimacimo llote:

—Asiamo nano cue rillarumona, niese omoi diga nagarui cue illana uiñotomoi.

19 Cai Nama diga abina iedoñeno maijuidicue. Eecana sure maijidicue. Judíuai cuena duere uiñodosia jira, ie facaiseconi dueredicue.

20 Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue.

21 Judíuaina llofueticue. Judíuaiñedinona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúna omoi iñuana jiai lloticue.

22 Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jir-ille rafuena uiñoñedicue;

23 iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”.

24 Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoga maijiana fuidoiacadicue. Mare rafuena omoimo lloiacadicue. Jusiñamui omoina duenaillana jiai lloticue.

25 Jusiñamui anamo omoi illa rafuena omoimo jai lloticue. Jai dane cue uiecona cioiñeitomoi. Iena uiñoticue.

26-27 Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite.

28 Mai omoi abí rairui. Jusiñamui Joreñodi omoína creyentiaina sedatate. Naimacina raise seda. Jusiñamui díbeimo itinona llofue. Naimie Jito fiodailla muidona, naimacina ote, naimie iena.

29 Naimacidi toica llaudaiai isoidimaci. Nia abina raise uiñoñedimaci. Cue jailla meinocni, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiai llaudaiai gaitaja isoi.

30 Omoimona uanañedicinona llorainidi iite. Creyentiaina ramo faitimaci, omoi llucinona fainonocaillena, naimaci díbeimo illena.

31 Ie jira abina rairui. Bie rafuena feitaño. Daje amani fiemona nana omoína jai llofueticue. Naiona omoína llofueticue. Aremona omoína jai llofueticue. Omoína cue duenaillamona, eianona omoína llofueticue.

32 Mai. Cai Nama illa anamo omoína fainonocaiticue. Naimie uaimona naimie omoína duenaillana jai uiñotomoi. Naie uaidi omoína jai ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi.

33 Jiaíno ie ucubena jaca nicidoñedicue. Bu ie iniroillaina jaca jai oiacañedicue.

34 Cue jitaille rana dama cue maijiano oticue. Cue diga jaidino imaci jitaille rana jai dama cue maijiano oticue. Iena nana omoídi uiñotomoi.

35 Iese cue illamona omoína llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feñoia, iobidicaí; iadedi cai eo

iobiacania, jiaínomo raruiaina fecadicaí”.

³⁶ Naie llua meino, naimaci diga caiñici ifodo rainadajano, Jusiñamuimo jide.

³⁷ Nana naimacidi eo eedimaci. Pablona caimaduanona, naimiena libanotimaci.

³⁸ “Cuená dana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí.

² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí.

³ Chipre railla uiasina cai cjojia, cai nabei díbeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaina nainomo joneacadimaci.

⁴ Tiromo ite creyentiaí cai baillanona, siete digarui naimaci diga iticaí. Jerusalémo naimiena judíuaí meineñellena, nainomo naimie jaiñellena, Jusiñamui Joreño naimacina Pablomo llotatate.

⁵ Digarui illa meinomo oni jaidicaí. Naie nairaimona nana naimaci cai diga jaidimaci. Riñoniaí, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jidicaí.

⁶ Naimaci facadua meinoconi, botemo jaidicaí. Naimaci imaci jofuemo abido jaidimaci.

7 Tiromona Tolemaida railla nairaimo jaidicai. Creyentiaina uaiduano, darui naimaci diga iticai.

8 Ie are jaillano, Cesaremo cai ria, Felipe jofomo jaidicai. Felipedi Jesucristo ie rafuena lloraima. Jerusalémo diáconuaina creyentiaí jaie fetua facaise, Felipena fetodimaci.

9 Naimie dinomo fiebidicai. Naimiemo cuatro jisa ite. Naiñaiñuai nia iima abina uiñoñede. Jusiñamui naiñaiñuaimo llucacina llocabitimaci.

10 Digarui nainomo cai illamo Judeamona damie bite. Naimie mameci Agabo. Jusiñamui facaina lloraima.

11 Caïmo ria, naimiedi Pablo cinturóna aiñode. Naie diga ie eillina maite. Ie onollina jiaí maite raillano:

—Jusiñamui Joreño raite: “Jerusalémo judíuai illacomini bie cinturón jainaoide imana daje isoi maítimaci. Judíuaiñedinomo naimiena fecajitimaci” raite.

12 Naiena cai cacajano, naie comini diga, Pablona caididicai, naimie Jerusalémo jaiñellena.

13 Pablo uai ote:

—¿Bue ñellena eedomoi? ¿Bue ñellena cue comequina ocuiñotañedomoi? Cue maiana jaca jitaídicue. Ua cue fiodaillana jaca jiaí jitaídicue. Cue Nama Jesús muidona cue fiodaiadedi, damamai fiodaiticue.

14 Cai lloga uai naimie iñoñena muidona, raiticai:

—Cai Nama jitaílle rafuena finuana jitaídicai. —Iemei llicaidicai.

15 Nano nigarui illanona, cai raruiaina finuano, Jerusalémo jaidicai.

16 Cesareamo ite creyentiaimona jiaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

17 Jerusalémo cai ria, creyentiaidi caina caimare uaidotimaci.

18 Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci.

19 Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaina jaidimaci —llote.

20 Naie rafuena cacajano, Jusiñamuimo iobilacinona fecadimaci. Iemei naimiemo llotimaci:

—Ama, ero, judíuaimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci.

21 O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fainonocaillana llofuetio. Naimaci uruia abina deñenana llofuetio. Moisés micori llogacinuaido jaiñellena llofuetio.

22 Ie jira ¿ñiese nibaiticai? O rillana jai fididimaci.

23 Ie jira omo cai llwana fino. Cai ecimo cuatro ima jai ite. Nie isoide rafuena Jusiñamuimo jai llotimaci.

24 Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena,

toica ocainaiaina naimaci facaina iba. Naie rafue omoi fuiduanona, omoi ifogina rijiruda gareit-
omoi. Ie mei nana comini mare rafuena o finocana
jaillana uiñoitimaci. Moisés micori llogacinodo o
nia jaillana uiñoitimaci. Iese omo lloiacadicaí.

²⁵ Judíuaiñedino Moisés micori llogacinodo
jaillena lloñeiticaí. Naimacimona creyentiaina
jaidinomo navui cueticaí: “Jiraraimo fecaca rana
riñeno. Diruena riñeno. Llerinoga rana riñeno. O
añede riño diga iñeno. O iniñede iima diga iñeno”
cueticaí.

²⁶ Pablo “Jee” raillanona, nai cuatro iima diga ie
are Moisés micori llogacinona finuano, Jusiñamui
jofomo jaide, naimie ie finoca rafue fuillarui llo-
lena. Jusiñamui nagamiaí rana fecajaruina jiaí
llote. Siete digarui illanona, Moisés micori llua
isoi, naie rafuena fuidoiacadimaci.

Pablona gaitaja rafue

²⁷ Naie siete iruillaí fuiacanuillaímo Asia-
mona damierie judíuaídi bitimaci. Jusiñamui jo-
fomo Pablona ciuano, comini comeciaina feido-
cana uitimaci. Pablona gaitajanona,

²⁸ cuiriidimaci:

—Caimaci, caína cano. Bimie naga illanomo llo-
fuiamona, cominina raise itatañede. Moisés micori
llogacinuaido jaiñede. Bifona raise sedañede.
Judíuaiñedino bifomo atiano, bie mare jofo naimie
jai jeare finode.

²⁹ Iese ite: Jerusalémo Trófimo diga Pablona
ciodimaci. Trófimodi Efeso nairai imie.
Judíuñedimie. Pablo naimiena Jusiñamui jofomo
uillamo comecina facadimaci; iadedi uiñede.
Judíuai cominimona judíuñedimie Jusiñamui
jofomo jaillana marañede.

³⁰ Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci.

³¹ Pablona meineiacania, soldaduai ie comandantedi nana comini ieillana fidide.

³² Ieconí naimiedi, ie soldaduai diga, nana ie illacomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci.

³³ Comandante naimiemo iaireicaia, Pablona gaitade. Naimiena mena lleo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci.

³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiacania, Pablo comandantemo llote:

—O diga ñaiacadie.

Raijicaillamona, naimie uai ote:

—Griego uaido ñaitio—

³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiadicue.

⁴⁰ —Jee —raite. Pablo tidabacui muidomo naidaide. Cominina llucaitallena, ie onollina jaidide. Comini llucaila mei, Pablo judíuai uaido naimacimo llote:

22

¹ —Caimaci, einamaci, cue abi riiduacinomo mai omoi cacarei.

² Naimie judíuai uaido llwana naimaci cacajano, llucaidimaci. Ie jira Pablo llote:

³ —Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueotícue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

⁴ Jesucristo ñnotinona jaie eo duere finodicue. Diga creyentiaina maianona, cárcelmo joneticue. Fiñiaina duere finodicue. Riñoniaina jiai duere finodicue.

⁵ Jusiñamui diga nanoca ñairaima cuena uñnote. Nana omoi illaicomini cuena uñnotimaci. Creyentiaina duere finollena, naimacimona dajerie cartana jaie feñoticue. Damascomo ite judíuaimo cuetimaci. Damascomo jaidicue, nainomo ite creyentia maiano, Jerusalémo atianona, naimacina duere finollena.

*Pablodi Jesúna ñnuana llua rafue
(Hch 9.1-19; 26.12-18)*

⁶ 'Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma

naidai iacania, ieconi monamona damie cue abina eo quetiñote.

⁷ Eniruemo ana uaidicue. Monamona damie cuemo llwana cacadicue: “Saulo, Saulo, ¿bue ñellena cuena duere finodio?”

⁸ Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.

⁹ Cue diga itinodi cue quetiñua rana ciodimaci; iadedi cue diga ñaitimiena cacaiñedimaci.

¹⁰ Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

¹¹ Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci.

¹² Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci.

¹³ Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena ciodicue.

¹⁴ Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uñollena, ie mare Jitona o cioillena, naimie uaina o cacareillena.

¹⁵ Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio.

¹⁶ Mai cue llwana ñno. Naidadajanona, o jeacino oni dotallena, Jusiñamuimo jica. Ie mei bautiza” raite.

Judíuainedimonio Pablo jailla llua rafue

¹⁷ 'Ie mei Jerusalémo abido cue billa mei, Jusiñamui jofomo Jusiñamuimo cue jñia, ñicairiticue isoidicue.

18 Cai Namana cidicue. Cuemo llote: “Jerusalémona raire mai jai. Cominidi o cuena lluana feiñoñeitimaci”.

19 Uai oticue: “Nama, naga judíuai ofiracomo ona inotinona fauidicue. Cárcelmo naimacina joneuidicue. Nama, Jerusalémo itino iena uiñotimaci.

20 Esteban micori fiodailla facaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meinetino iniroina sedadicue”;

21 iadedi cue Nama cuemo llote: “Mai jai. Judíuaiñedinomo ona are oretaiacadicue”.

Comandante anamo Pablo illa rafue

22 Bie lloga dinori comini Pablo lluana cacadimaci. Iemei cuiriidimaci:

—Bie isoide ima illana benomo jitañedicaí. ¡Naimiena meine!

23 Cuirillamona naimaci iniroina jaidisite. Icirisiano eniruena jiaí fadosite.

24 Judíuai uaido cominimo Pablo llua jira, comandante iena cacaiñede; iadedi comini icirillana cianona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.

25 Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

26 Capitán iena cacajano, comandante dine jaide. Iena llote. Jicanote:

—¿Niese nibaiticaí? Bimie romanuai nairai imie.

27 Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

28 Comandante dinena raite:

—Romanuai nairai imiēna cue jaillena, eo ibadīcue.

Pablo uai ote:

—Romanuai nairai imiēna jeicigacue.

29 Ieconī naimiēna duere finoacadino naimiēmona raire oni jaidimaci. Pablo romanuai nairai imiēna jira, naimiēna jai ebena maia jira, comandante jiai jacinaitē. Comecina nibai facade: “Iese naimiēmo cue finua jira, ie ibana ollena, cue illaimamo cuena jiai llogidoite”.

Illacomini motomo Pablo illa rafue

30 Comandantedi judiūai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judiūai illacomini diga, ofillena llote. Pablona atiano, naimaci motomo uillanona, naimiēna naidanete.

23

1 Ie abina riidollena, Pablo naie judiūai illacomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidīcue. Naimiēmona cue comeci mare.

2 Ananiadi Jusiñamui diga nanoca ñairaima. Pablo lluana naimie gaiñenamona, Pablo ecimo itinona Pablo fuena farotate.

3 Pablo dinena naimiēmo llote:

—Jusiñamui o fueña faroite. Mareuidimiena abina caitadio. Moisés micori llogacinuai muidona benomo itio, cuemo lollena; iadedi cue finoca rafuena raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iena jaie cuiana uiñoticue. “Illaicomina jeare ñaiñoeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Cominimo Pablo eruaillamona, saduceuai railla comini nainomo illana cide. Fariseuai railla comini nainomo illana jiai cide. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacino mo ocuriticue. Ie jira bene cuena llogidoiacadomoi.

⁷ Naimie iena lloia, naimaci comeciai daje isoi lloñedimaci.

⁸ Saduceuai cominidi fariseuai comini isoi ñnoñedimaci. “Fiodaillamona jilloñeiticaí” saduceuai comini raillana ñnoside. “Jusiñamui jaienisaí ññede. Comini joreñuai ññede” raillana ñnoside; iadedi fariseuai comini dinena nana naie rafue illana ñnotimaci.

⁹ Ie jira eo failliñaidimaci. Fariseuai motomona jiaíno naidadajanona, llote:

—Bimiemo jeacino ññede. Jusiñamui jaienici naimiemo nibai jaie lluamona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedi soldaduaïmo cuartelmo naimiena uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹² Monaidemo, judíuaimona jiaïno comeciaina facadimaci: “Pablona nia cai meineñenia guiñeiticai. Jiroñeiticai”.

¹³ Cuarenta baïfemo ite comini iese comeciaina facadimaci.

¹⁴ Naimaci judíuai illaïcomini ðine jaillano, raitimaci:

—Dani comeciaina facadicaï: Pablona nia cai meineñenia, jaca buena guiñeiticai.

¹⁵ Omoi ðine Pablona atillena, naimïemo eo raise jïcanua isoi, comandantemo jïcano. Pablo iaïrei bia, naimiena cai meinellena, ocuidoiticaï.

¹⁶ Pablo enaise naïe rafuena fidiano, cuartelmo jaide, Pablomo llollena.

¹⁷ Iena cacajano, Pablodi capitána uaidote. Raite:

—Bie coniruenta comandante ðine uiño. Naimïe ðiga ñaïacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jïcanote. O ðiga ñaïacade.

¹⁹ Naimïe onollina comandante llinocaida, baï ie atianona, naimïemo jïcanote:

—¿Bue cuemo lloiacadiïo?

²⁰ Naimïe uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci.

²¹ Naimaci jitailla isoi finoñoeno. Cuarenta digamie bai femo naimiena reiduanu sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduanu raite:

—Jaca bumo cuemo o lluanu lloñoeno.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci rarui ai finollena, Cesareamo navuida bai fe imaci jaillena. Setenta caballuaido jaitino uaido. Doscientos ducirainina jiai uaido.

²⁴ Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote.

²⁵ Cartana jiai cuete. Iese cuete:

²⁶ “Félix, omo cueticue. Claudio Lisiasdicue. Cai mare gobernadorio. ¿Nigacino? Cue uai o dine oredicue.

²⁷ Damie o dine oredicue. Judíuai naimiena meineiicana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue.

²⁸ Judíuai illaicomini dine naimiena uiticue, naimaci llogiduacinona raise cue uiñoollena.

²⁹ Naimaci einamací llogacínuaí muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacaiñedicue.

30 Jiaíno naimiēna dane meineiacanana fididicue. Ie jira o dīne naimiēna oretaticue. Ie llogidotino o dīne jaillena jiai lloiticue. Naimaci naimiēna omo lloitimaci” cuete.

31 Comandante Ilua isoi, soldaduai naiona Pablona Antipatrismo uitimaci.

32 Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide.

33 Cesareamo railla nairaimo rillanona, gobernadormo cartana fecadimaci. Naimie dīne Pablona jiai uitimaci.

34 Gobernador cartana facade. Ie mei Pablomo ie nairai illanona jīcanote. Pablo uai ote:

—Cilicia.

35 Gobernador dīnena raite:

—O llogidotino bia, o rafuena cacajiticue.

Soldaduaímo jiai llote:

—Omoi anamo Herodes railla illaíma micorí jofomo naimiēna seda.

24

Félix dīne Pablo riidua rafue

1 Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiai bite. Naimiedi llogidoraíma. Gobernadormo Pablona llogiduaíbitimaci.

2 Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimedio. O muidona eo uri iticai. Cai nairaina canollena, diga mare rafuena finodio.

3 Iobillamona, nana cai iena feiñoticaí.

⁴ Ona iciacaiñedicue; iadedi o fue maria jira, cue lluomo dallu cacarei.

⁵ Bimiedi eo cai abina aruire finode. Nana eniruemo ite judíuaina uri itatañede. Naimiedi Jesús raillamie rafuedo jaidino illaíma.

⁶ Jusiñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí;

⁷ iadedi comandante Lisias ride. Caimona naimiena riire bairode. Naimiena cai llogidollena, o dine cai billena caimo llote.

⁸ Pablomo o jicanoiacania, naimiemona bie rafuena uiñoitio. Nana naimiena cai llogiduacinona uiñoitio.

⁹ Judíuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticaí. Ie jira cue abina riiduacinona omo marefodo lloiticue.

¹¹ Doce digarui illanona, Jerusalémo como birui ridicue. Iena uiñoiacadiosa jiaie cominimo jicano. Jusiñamuina sedallena, Jerusalémo iticue.

¹² Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofracuaimo uaina jiaí uaitañedicue. Naisomo uaina jiaí uaitañedicue. Cominina uri itatañenana lloñedicue.

¹³ Nie isoide rafuena cue finuana coiñedimaci. Ie jira cuena raise llogidonidimaci;

¹⁴ iadedi jiaie rafuena lloiticue. Cai usumatiaí Jusiñamuina sedadimaci. Naimiena jiaí sedadicue. Nana Moisés llogacinuaina ñnoticue. Nana

Jusiñamuina lloraini micriai cuegafuiaina ñnoticue. Bimacimona jiaie llogacinuaido jai jaidicue. Bimacimona uanañedicinodo jaidicue.

¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotitimaci.

¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena.

¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajabidicue.

¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Comina iciritañedicue.

¹⁹ Naie facaise Asiamona jiaie judúuai bitimaci. Cuemo nicino ia, ¿bue ñellena naimaci bene biñedimaci, cuena llogidollena?

²⁰ Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci.

²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús dibeimo itino rafuena raise uiñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite.

²³ Félix capitámo Pablo cárcelmo sedajana llote. Naimiena maiñellena jiai llote. Naimiena

canollena, naimie nabaiñiaia naimie dine jaillena rairuiñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiaimaia. Jesúna iinuana cacadiaimaia.

²⁵ Jeacino finoñellena, dama ie jitailla rafuena finoñellena, jiairuido Jusiñamui riccaillafue anamo iñellena cacadiaimaia. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

²⁷ Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona faionocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide.

² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci.

³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.

⁴ Festo uai ote:

—Pablo Cesareamo fiebiite. Raire nainomo abido jaiticue.

5 Omoï illaicominimona damierie cue diga jaitimaci, nicino naimiemo ia, naimiena llogidollena.

6 Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo llouillanomo raide. Pablo atillena llote.

7 Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci.

8 Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

9 Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadío? Nainomo nana bie rafuena siadoiticue.

10 Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judíuaimo jaca buena finoñedicue. Iena raise uiñotio.

11 Romanuai railla nairai illaicomini llogacinona cue ñnoñenia, damamei jearede rafuena cue finoa, cue fiodaillemo jaca ocuiridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

12 Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaia. Agripadi naie enirue illaia.

¹⁴ Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene faionocaide.

¹⁵ Jerusalémo navui cue ia, Jusiñamui diga nanoca ñairaimadi, judíuai einamaci diga, naimiena llogidote. Naimiena duere finollena cuemo jicanotimaci.

¹⁶ Naimaci uai oticue: “Cai Romanos cominidi llogidogamiena jamai tainomo duere finoñedica; iadedi llogidogamiedi ie llogidotino uai nano cacareitica. Ie mei ie abi ridollcinomo jiai cacareitica”.

¹⁷ Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue.

¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci.

¹⁹ Dani naimaci inuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite.

²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”;

²¹ iadedi Pablo nainomo jaiacañede. Cai nanoca illaia dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaia dine naimiena cue nia oreñañenia.

²² Agripadi Festomo llote:

—Naimie ñaiana cacaacadícue.

Festo uai ote:

—Íco are naimie ñaiana cacareitío.

²³ Ie jira ie are Agripa, iaímaiaí Berenice diga, gobernador ofiracomo bitiaímaiaí. Finobillano ebire bitiaímaiaí. Soldaduaí imací illaícominí jiaí bitímací. Naie nairaímo ite nanoca cominí jiaí bitímací. Ofilla mei, Festo Pablona atíllena llote.

²⁴ Festo llote:

—Agripa, nana beno itino, bimiena cídomoi. Jerusalémo ailluena judíuaí naimiena llogídotímací. Bene cue dine jiaí bitímací. Naimie meiniana eo jitaídímací;

²⁵ iadedí naimiemo nícinodí iñenana jai uíñotícue. Naimiena meinellena cue llollena, nícinodí naimiemo iñede. Augusto dine naimie jaillena naimie jícanua jira, naimiena oretaitícue.

²⁶ Nícinodí nia iñede, caí illaímamo cue cuellena. Ie muidona omoi dine naimiena jai atídícue. Agripa, naimie ñaíamo raise cacarei. Naimiemo caí jícanua mei, níbaí nícino naimiemo illana uíñoitícaí. Iemona Augustomo cueitícaí.

²⁷ Augusto dine llavecamié cue oretaia, naimiemo nícino iñenia, cuemona maraiñede.

26

Pablo ie abina dane riidua rafue

¹ Naie facaise Agripa Pablomo llote:

—Mai llono. O abí riíduacinona cacaacadícue.

Pablo: “J#” raillanona, ie onollí a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoitícue. Judíuaí cominídí diga rafuena cuena llogídotímací.

³ Nana cai judíuái rafuena raise uiñotio. Nana cai einamací rafuena jái uiñotio. Cuemo raise cacarei.

⁴ Jerusalémo naimací motomo cue illa jira, diga judíuái cue coniruenamona cuena uiñotimací.

⁵ Cuena naimací lloiacania, fariseo imiēna cue illana are uiñotimací. Jáie comini baifemo fariseuaidi cai einamací llogacinuaina ñnotimací.

⁶ Jusiñamuidi cai usumatiai micoriaimo fiodaillamona comini ico jilloillena jaie llote. Ie suillemo jai ocuridicue. Ie jira llogidoracomo birui jai iticue.

⁷ Nagarui Jusiñamuina naimací eo sedajamona, cai doce nairaidi naie llogacino suillemo jái nia ocuridimací. Ore illaīma, bie ocurillacino muidona judíuái illaicomini cuena llogidotimací.

⁸ ¿Bue ñellena Jusiñamuidi comini fiodaillamona jillotajana ñnoiacañedomoi?

⁹ Jáie ie isoidicue. Nazaret ie Jesúna ñnotinona diga jearede rafuena jaie finoacadicue.

¹⁰ Jerusalémo iena finodicue. Cárcelmo ailluena Jesúna ñnotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue.

¹¹ Diga judíuái ofiracomo, diga icaiño, naimacina duere finodicue. Naimací Jesúna jeare ñaiana jitaidicue. Naimací diga cue eo icirilla jira, jáie eniruemo ite nairaimo jái jaidicue, naimacina duere finollena.

*Pablodi Jesúna ñnuana llua rafue
(Hch 9.1-19; 22.6-16)*

¹² Ie jira Damascomo jaidicue. Jusiñamui diga nanoca ñairaini uaido jaidicue.

13 Ore illaïma, jitoma naidai ia, monamona quetiñotena cidicue. Naidi jitoma baifemo quetiñote. Cue abina quetiñote. Cue diga itino abina jiai quetiñote.

14 Eniruemo cue ana uaiia, damie lluana cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio”.

15 Uai oticue: “¿Budiota?” Cai Nama cuemo llote: “Jesúdicue. Cuena duere finodio.

16 Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uiñotalle rafuena jiai lloitio.

17 Naimaci ona duere finoia, omoi cominimona ona jillotaiticue. Judíuaiñedinomona ona jiai jillotaiticue; iadedi judíuaiñedino dne ona ore-taiticue,

18 naimaci comeciai tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci ñnuamona, nana cuena ñnotino diga cue illano ico jaca iitimaci”.

19 Ore Agripa, monamona cue cacaja rafuena ñnoticue. Jesúdi Jusiñamui Jitona ñnoticue.

20 Damascomo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuaiñedinomo iena jiai lloticue. Lloticue: “Omoi

comeciaimo iticinona meido, Jusiñamui dibeimo omoi illena. Omoi comeciaimo iticinona omoi meidua mei, mare rafuena finocana jai”.

²¹ Ie jira judíuai illaicomini Jusiñamui jofomo cuena gaitadimaci. Cuena meineiacadimaci;

²² iadedi Jusiñamui cuena canode. Ie jira birui bene iticue. Illaicominimo beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiai birui lloticue. Jiaie rafuena lloñedicue.

²³ Jai e cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uiñoitimaci. Iemona judíuaiñedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

²⁵ Pablo uai ote:

—Uairicoñedicue. Festo, odi cue illaimadio. Cue llucacnodi uanaicino. Ebena ñai-ñaiacaiñedicue.

²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede.

²⁷ Ore Agripa ¿Jusiñamui lloraini cuegafuina ñnotio? omo jicanoticue. Iena o ñnuana jai uiñoticue.

²⁸ Agripa dinena uai ote:

—Dallu o ñaiamona, cuena creyentena nibai itataiacadio.

²⁹ Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaicue. Ua nana cue ñaiana cacadino cue isoi jaillana jitaicue; iadedi omoi bie lloeo diga maiana jitaicue.

³⁰ Iemono Agripa naidacaide, Festo diga, Berenice diga. Nana raidino jiai naidacaidimaci.

³¹ Jino jaillano, Pablo joreña siadotimaci:

—Bimie jaca buena finoñede, naimiena cai meiniana lollena. Buena finoñede, cárcelmo illena.

³² Agripa Festomo llote:

—Naimie cai nanoca illaima dine jaillana jicanoñeden, niadedi naimie jino marena oreca.

27

Romano Pablo jailla rafue

¹ Italiomo Augusto dine Pablo oretajana Festo lua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaiaide.

² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaillena ote.

⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai.

⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia.

⁶ Naie bote Roma dine jaiñena jira, capitádi jiaie botena jenode. Capitádi Alejandríamona bite botena baite. Naie bote Italiamo jaiacade. Ie jira naie botemo cai jonecaida, caina uite.

⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai.

⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiño caimo sefuiticai. Cai raruiaina nibai faifiticai. Botena jiai nibai faifiticai. Cai nibai jiai faifiticai —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaimaii lluana Pablo lluana baifemo inote.

¹² Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide.

¹³ Beici dinena aifidi bia, “cai jitailla aifidi bite” raillanona, suiñodicai. Creta iairei monaillai fuemo jaidicai.

14 Ie mei raire cai dine eo riire aifi bite. Naie aifi noci deisoilla dinena bite.

15 Botena oni uite. Botena atona eronenidicai. Ie muidona jamai ebena jaidicai. Aifidi caina iese uite.

16 Janorede uiasi fuemo aifi raise iñenanomo jaidicai. Nai uiasi mameci Clauda. Faiññellena bote ie janorede nocae sefuire a aiñodicai.

17 A aiñua mei, rao diga botena ruica maíticai. Sirte railla conillie illanomo cai joodai raillano, velaiana duiñodicai. Iemei aifi jamai uigacai.

18 Ie areruido aifi riire illa jira, cargana oni dotadicai.

19 Dane ie are bote ie rarui, cai onolli diga, oni dotadicai.

20 Diga irui jitoma bainide. Diga irui ucuai jai bainide. Aifi eo riire nia ite. Cai jillobiñellemo jai ocuiriñedicai.

21 Diga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuiñedicai. Cretamo cai fiebidicaina, bie isoi sefuiñedicai.

22 Omoi comeciaina ocuiño. Bie botedi faifite; iadedi caimona jaca buna faifñeite.

23 Jaive naiona Jusiñamui jaienici cuemo bairede. Jusiñamuimo jainaiadicue. Naimiena sedadicue.

24 Naie jaienici cuemo llote: “Pablo, jaciruiñeno. Romamo o nanoca illaima dine iitio. Jusiñamui ona duenalla jira, nana o diga jaidino jilloitimaci”.

25 Ie jira omoi comeciaina ocuiño. Cuemo llua isoi, naimiedi bie rafuena suiteite. Jusiñamui iena finuana ñnoticue.

26 Nibaí uiasimo jutadaiticai.

27 Catorce digarui naiø illamona, Adria railla monaillaimo jamai cai jaia, naiøna daferui fa-cai marineruaidi: “Enirue iaire ite” raillanona comeciaina facadimaci.

28 Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede.

29 Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci.

30 Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

31 Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

32 Ie jira soldaduaidi nocae maia raona jaitadimaci. Jai dinomo nocaena faionocaidimaci.

33 Nia monaiñenia, Pablo nana caimo llote:

—Guiño. Catorce digarui illanona, jai guiñedomoi.

34 Ie jira guiño, omoi mairillesa. Ua faifiñeitomoi.

35 Iese naimie raillanona, Jusiñamuimo iobillacinona fecade, nana comini illa uicomo. Llomeniconatairuano, guite.

36 Nana naimaci comeciái ocuiñocaida, jiai guitimaci.

37 Botemo doscientos setenta y seis diese iticai.

38 Cai monillamona, fiebide trigona monaillaimo oni fadodicaí, bote meenaiñellena.

³⁹ Ie oni monaidemo, erodatemo, naie eniruena uiñoñedicaí. I gobemo conillici illana ciodicai. Nainomo jamai ebena siñiacadicaí.

⁴⁰ Ie jira lloelluna nainomo oni fainonocaidicaí. Datarabe maiana suiñoñodicaí. Vela aifimo sebiñoñoticaí. Monaillai fuemo enirue dine jai jaidicaí.

⁴¹ Iemei jaiciridifomo ridicaí. Eniruemo jodate. Bote muido eniruemo jai aire jodate. Eo baguamona jillaci taicosite.

⁴² Naimaci iamona jillobi raillano, soldaduai llavecanona meineiacadimaci.

⁴³ Pablona jillotaiacana jira, capitán iena rairuide. Lote:

—Nano iana uiñoñotino diese monaillaimo ana daia. Eniruemo jai.

⁴⁴ Jiaino bote ie rabiçido juicaida icana jai. Jiaino bote ie raruiado juicaida icana jai. —Iese eniruemo nana marena ridicaí.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoñoticaí.

² Nainomo ite comini caina marena feiñoñotimaci. Iraina bonotatimaci. Nocí deilla jira, rosirena jira, irai ecimo agaillena caina uaidotimaci.

³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiëna ainide.

⁴ Jaio naimie onollido llillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede.

⁶ Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi nibai Jusiñamui.

⁷ Naie illanomona uiasi illaima enirue iaire ite. Naimie mamecidi Publio. Caina marena feiñote. Darui amani ie jofomo caina marena itatate.

⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate.

⁹ Bie rafue suilla jira, naimie dine nana uiasimo ite duidino bi-bidimaci. Naimacina jillotate.

¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicai. Naie uiasimo nana rolime facaiseconi naie bote ite. Mena jusiñamui iaiaiaia joreño bote muidomo ite. Damie Cástorna mameciredede. Jiaimie Póluxna mameciredede.

¹² Naie botedo oni cai jaillanona, Siracusamo sijidicai. Darui amani nainomo iticai.

¹³ Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai.

¹⁴ Sija mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai.

15 Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodí Jusiñamuimo iobilacino fecade. Ie comecina jiaí ocuiñote. Cai diga Romamo jaidimaci.

16 Romamo cai ria, capitán llavecana ie illaimamo fecade. Cárcelmo Pablona naie illaima oreñede; iadedí Pablo ie ibauiga jofomo eneno oni orede. Aisií raillano, daje soldado nainomo naimiena sedade.

Romamo Pablo llofua rafue

17 Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacinuaina jaca ñnoticue;

18 iadedí Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira;

19 iadedí judíuai: “Dama ite” railla jira, cai nanoca illaima dine jaillena jicanoticue; iadedí cue nairai diga jaca iciriñedicue.

20 Omoí diga ñaillena, omoína cioacadícue. Fiodaillamona íco comini jillollena cue llofuecabilla jira, bie lleo diga maigacue.

21 Uai otimaci:

—Judeamona jiaino ona cuega cartana jaca feiñoñedicaí. Caimo o rafuena llollena, jaca buna biñede. Bene jaca bu ona jeare ñaiñede.

²² Ie jira omona naie rafuena cacaacadicaí. Naga illanomo comini o llofuiana uaitajana uiñoticaí. Creyentiana jeare ñaitimaci. Iena fididicaí. Ie jira caimo iena raise lloño.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui ñibeimo naimaci comeciái iuaina meiduana llofuate. Moisés micorí llogacínuaímona, Jusiñamui facaina lloraini micoríái cuegafuaímona, Jesúsna llofuate.

²⁴ Jiaíno naimie llofuiana ñnotimaci. Jiaíno ñnoñedimaci.

²⁵ Nana naimaci comeciána daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorína caí usumatíaímo raise llotatate. Omoi usumatíaí micoríái illa isoi nia itomoi. Isaías micorídi omoína jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Lloño: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciái jai taíno mo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue ñibeimo iacaiñedomoi, omoína cue jilloitai raillanona’ ”.

²⁸ Jusiñamui rafuena omoi ñnoñena muidona, judíuainedínodi Jusiñamui naimacína jilloitaícanana jai fididimaci. Naimaci iena cacareitimaci.

²⁹ Iese naimie llua mei, judíuaidi coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote.

³¹ Naimie anamo naimaci illana Jusiñamui jitailla jira, Jusiñamui dibeimo naimaci comeciái iuaina meiduana llofujete. Marefodo llofujete. Naimiedi cai Nama Jesucristo rafuena llofujete. Jaca budí naimie llofuiana rairuiñede. Teofilo, jaca digacino omo jai lloticue. Mai. Lucadicue.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

cxx

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488